

# **Roma Leta**

## **Polimna Iriki Roma Sosim pilwa**

### **Leta**

### **Isipkita Yitkak**

Onggityam Roma Leta irika riga re Polte. Ton yirikonj re sosim pilwa na rina re yibnonj Roma taunind. Pol itemb leta yirikonj onggit win nat re ton nowam misnari menamena seg awonj A.D. pipti siks dide pipti seben (56-57) kemag gangand.

Pol kea singi awonj naskajog menonim de Yerusalem taun wa, i ingkek ket de Roma wa, i ket kikitumamjog de Spein kantri wa. Si Pol itemb leta Roma sosi riga wa erikawonj re tinim nya ongonjena mana, nokim da idenat ton Roma sosi danda kima ugowam tadariny.

Si onggit letam ukoi jog yitkak iriki re negir kesa dimdimjog mile gatab e. I Pol kwa ninda ukoi jog ouyaena aramisiny onggit letand da:

1. Makwa ita yete tilenggyam negir kesa dimdimjog riga yibim
2. Yesu Keriso re iminjog negir kesa dimdimjog riga e
3. Si ra men Yesund gar ke utkunda ke okasu, 1) men re kea b'itrari riga im aindam negir milemna dandam pilke, 2) men re kea sisil yirkokar okati riga im, 3) dide men re kea itekindam iminjog God kima yipand b'inkindena mile wa.
4. Men b'ogla gar ke utkunda mile nenand wimena wowenin ringkae re negir kesa

dindimjog riga aukindam dide ringkae re  
God sam yokateny.

### *Simesime Yitkak*

<sup>1</sup> Simesime! Kon Keriso Yesu ma wiko riga Pol ten rina re God ara nemokonj itmikitijog rigam i nobagendonj God ma b'ogil yirkokar bage yit pitapita omnenam. <sup>2-3</sup> I God re get kena tirir yomnonj dide tina bageyam waina yim kena yina peband erikinonj onggit Tina B'igamna b'ogil yirkokar bage yit gatab. Re onggit b'igat rigaina b'usmurena nya yokatonj, si ket ukendonj Dawidimna kus ke. <sup>4</sup> I Tina Wingawinga yibnonj re yinayina na, si Ton uj ke utnyitonj juwai kima dide ingkek ket iminjog yomnonj da Ton re Godimna B'iga e. Ton re mera Yonggyam, Yesu Kerisote. <sup>5</sup> Sin Ti pilkena akatonda wurar dide itmikitijog riga nyi, mop nokip idenat sin Tina nyi map riga wang teyenindam komkesa God ma obagiki kesa riga wa wingirind. Si ingkaimemb rigap Tin gar ke utkunda ke okatenyi i ket Tin yimta undokenenyi. <sup>6</sup> Si wida kwa opima eomkiti wekenyit onggit riga wingirind yena re God ara emokinonj Yesu Kerisomna riga awowim. <sup>7</sup> Win leamog im re komkesa wekenyit Roma wa yena re God singi eyeniny i dide abagikiny Tina yina rigam, mera b'u Godim pilke dide Yonggyam Yesu Kerisom pilke wurar dide ngimbla win kima.

### *Pol ma Singi Roma wa Menonim*

<sup>8</sup> Naska kon kor Godind Yesu Kerisomna nyi kima siteket yit omnyin komkesa wa gatab, mop nokip waina gar ke utkunda gatab yidir yit re kea

pita nate auka yikeny komkesa gowukoyind. <sup>9</sup> I kon Godim wiko yomnikainyın re kupkakupka koina gar okai kima e Tina B'igamna b'ogil yirkokar bage yit pitapita omnena wingirind. Si Ton re koina yir ungatayam e ringma re kon ita winind wen nony eyeneninyin. <sup>10</sup> I ite re kon yir opmitenenyin, kon ita ita winind yerkenenyin da ama rika God ita b'ogil nya nitpangendau kornim menonim de wa pilwa Tina singind. <sup>11</sup> Mop nokip kon ukoi singi en wen yir ongongim, nokim da idenat kon God ma okai wingawinga ke wurar yingg iyenyin dem wanım danda kima onyitam. <sup>12</sup> Si odede mile re meranım yipand gilgil God ma danda kima b'ugowam e ji mera wingirind, odede ite re waina gar ke utkandat kor danda notkau, dide koina gar ke utkandat wa danda takainy. <sup>13</sup> Kor nany dide yingganwar! Kon ma singi en da win wumir kesa tekenyit rinte re kon pop jogjogpyam yisamkenenyin menonim wa pilwa, aji kornim nya re idoki e yibneneny wa pilwa menonim ngirpu yu. Kon wa pilwa menonim singi aenenyin re odede ma da, kon wen wingawinga ke kip kima tamnikinyin odede yipa wip ringmana re kon ninda God ma obagiki kesa riga wa wingirind amnikeneninond. <sup>14</sup> Si Kon b'ogla God ma b'ogil yirkokar bage yit yingg iyenyin komkesa riga wa pilwa, Grik yit opurena riga wa pilwa yepim re multekip kima riga dide Grik yit wumir kesa Barbariya Riga wa pilwa yepim re multekip kesa riga, i dide wumir riga wa pilwa yepim re sikil wumir kima riga dide korirkorir riga wa pilwa yepim re sikil wumir kesa riga. Ra maka ra kon yingg iyenyin, itemb re kornim negir e. <sup>15</sup> Si onggit

paemb ji kon ukoi singi en God ma b'ogil yirkokar bage yit kwa pitapita omnenam wanim yepim re win Roma taun wa wekenyit.

### *God ma B'ogil Yirkokar Bage Yit ma Danda*

<sup>16</sup> Kon makwa ita ingar yokatenyın God ma b'ogil yirkokar bage yit gatab, mop nokip God ma danda re indamaemb yibim yirkokar okawam komkesa riga wa yepim re gar ke utkunda ke yokatenyi, naska Ju riga wa i dide kwa God ma obagiki kesa riga wa. <sup>17</sup> Mop nokip God ma negir kesa dimdimjog mile pitapita aeneneny re onggit God ma b'ogil yirkokar bage yit gar ke utkunda nena kae otomapu ke ngirpu undwatapu wa. Si yina peband ija emb ji iriki yibim da, “Negir kesa dimdimjog riga re gar ke utkunda nena kae yirkokar wimena okateny dem.”

### *God ma Obagiki kesa Rigaina Negir Mile*

<sup>18-19</sup> Godimna ouyaeni wumir gasa opima pitakipind wekeneny towa wingirind dide God opima onggityam gasa pitapita amnikeneniny towanim ongwatam da Ton re iminjog God e ewangayam. Aji rigapim ogoka yiyenyi itemb iminjog Godind ewangayam, dide towaina negir kima kaokao mile nena im amorkenenanj. Si onggit paemb God ma ukoi soro kima b'isagika pita aukeneny pumb ke de onggit rigaina komkesa Godind ewangaya kesa mile dide negir kima kaokao mile wa pilwa. <sup>20</sup> I gowukoi otomapu ke God opima Tina yir ongi kesa gasa pitapita amnikeneniny komkesa gowukoi gasa wa pilind, opi re Tina ngirpu kesa danda dide Tina yinayina mile. Nokip ingkaimemb rigap nony

ke angwatenenanj da opimemb gasa re iminjog Godimna omniki im. Si rigap ririr im pitand yir ongongim dide isipmarenam. Si onggit paemb ton ma ririr im ril ogenka teyenanj da, “Kon ma wumir en God.” <sup>21</sup> Si onggit paemb ton pop yongwatenyi da yete God, aji ton makwa opima Godind yewangaenenyi towaina God pila, o siteket yit Tin yommenenyi. I ton pop b'ogil im Tin ewangayam dide Tin siteket yit omnenam, aji ton nony menamena amnikenenanj re kaokao nya kaim korirkorir re dide. I towaina gar re Godimna yinayina gasa ipindeni kesa im sibibind ikangindi wekeny. <sup>22</sup> Ton towalenggyam jaba b'agenairanj da “Sin b'ogil multekip kima riga im,” aji ton re wumir kesa korirkorir riga im aukenenanj. <sup>23</sup> I dide ton kwa dadal itkika kesa God ma b'ogil inyomarena yengendenenyi de itkika kima idol wa pilwa rinsim re rigap amnikenenanj, dide rinsim ra titkikanj dem, odede wip opi re riga, i ngena, i b'angga, i dide mukak ke gowind menamena b'angga.

<sup>24</sup> Si onggit paemb ji God ket ten aramiteneniny kilkil negir mile omniam towaina gar ke gowukoi negir b'iyena mile singind. Si ingkaimemb ton towaina ji isnawa kesa ingar kima negir b'iyena mile omniam engaenenanj towa wingirind. <sup>25</sup> Si ija emb ji ton Godimna iminjog mile yengendenenyi de b'anyginena mile wa. Aji ton pop b'ogla otobarki God nena ewangaya yeyene dide emorka yeyene, aji ton daka God ma omniki gasa im ewangaya eyenenanj dide emorka eyenenanj. Si otobarkayam God b'ogla esourena yakaten dadal ngirpu kesa, iminjog. <sup>26</sup> Onggit mop paemb ji

God ten aramiteneniny isnawa kesa ingar kima gowukoi negir mile omnika singind. Si kwa toda konggap God ma oramiti get ke molkongga mile engendenenanj de kongga ake kongga negir b'iyena mile wa. <sup>27</sup> Odede yipaina nya kaim, rigap toda kwa towainajog kongga kima God ma oramiti get ke molkongga mile singi kesa im aukenenanj. Aji ton re towaina negir b'iyena mile im singi eyenanj towa wingirind. Si ija emb ji towaina negir b'iyena singi aukenenanj wul dimil pembpemb re dide. Si ton riga ake riga ukoi ingar kima b'iyena mile im amnikenenanj. I dide ton opima towalenggyam onggityam towaina omniki negir mile ririrind negir mira akatenenanj. <sup>28</sup> I dide ton kwa ija imemb towaina garind towaina okateni Godim gatab iminjog wumir b'isaenenanj. Si onggit paemb ji God ten aramkeneniny towaina negir itkiki nony menamenand. Nokim da idenat ton onggityam gasa nena tamnikenenanj rinsim re ma omnika mim.

<sup>29</sup> I ton towaina garind odede negir mile ke yindangir im wekeny, opi re komkesa b'engabenga wip negir kima kaokao mile, wimena wingirind ingar kima negirjog mile, butum mile, dide negirjog ke mira b'amnena mile. Dide ton re kwa yindangir im wekeny odede negir mile ke, opi re nonyik b'iponena mile, onganda mile, b'ipowa mile, b'anyginena mile, dide negir omnika singi iyena mile. I ton re negir b'ugaga riga im. <sup>30</sup> I ton re negir yit opurena riga im. I ton re Godim singi kesa mile riga im. I ton re riga ji malik omnika riga im. I ton towalenggyam nony ke b'urowatena mile riga im. I ton re b'asourena mile riga im. I ton

re negirim isamka riga im. I ton re towa b'umar ake towa mogwar isnawa kesa riga im. <sup>31</sup> I ton re b'ogil mile wumir kesa korirkorir riga im. I ton re towaina tirir omni yit erbeka riga im. I ton re singi b'iyena kesa riga im. I dide ton re kear kesa riga im. <sup>32</sup> I ton wumir im God ma b'isagika gog yit it re da God opima odede mile omnika riga ujim tesagikiny dem, aji ton onggityam negir mile im usairenenanj. Si ton ma onggityam negir mile nena im usairenenanj towalenggyam, aji ton kwa sam kima odede yit ke riga wa b'ogil mim emjatenenauranj da, "Opimemb mile re b'ogil im omnikam."

## 2

### *God ma Dimdimjog B'isagika Mile*

<sup>1</sup> Kor riga! Man riga wa pilind negir ma b'isagika mile im amnikeninyit, aji madaka yipa ririr negir mile im amnikeninyit. Si ingkaemb man molenggyam mornim negir ma b'isagika amnikeninyit. Onggit paemb man makwa ririr e ril ogenka teyeninyit Godim pilwa da, "Kor awir im negir." <sup>2</sup> Si men wumir im da Godimna b'isagika mile re Tina iminjog mile kae pita tainy dem towanim yepim re odede yipa ririr negir mile amnikenenanj. <sup>3</sup> Kor riga! Si mansim namb riga wa pilind negir ma b'isagika mile amnikeninyit, aji madaka opima odede yipa ririr negir mile amnikeninyit. Si ringma moina nony menamena, rika ririr et man b'itkenyit dem Godimna negir ma b'isagika milem pilke? <sup>4</sup> O minda man maka wumir awot da, God Tina ukoi kear kae yindangir momnikeneny, dide Ton ita winind mornim negir

ma b'isagika mile ogoka miyenaeneny, i dide Ton mumakesajog yibneneny win okawam mornim negir milem pilke engendam Ti pilwa? Si nangga pae man Godimna ukoi jog kear kak wa yomnenenyit? <sup>5</sup> I ra Godimna negir kesa dimdimjog b'isagika win pita tainy dem, itemb re ma sobijog soro kima e dem. Aji man moina gar rogilkak dide engendi kesa gar kima e mibnenenyit. Si ingkaemb man mornim ukoi soro kima b'isagika angurka yiyenyit. Si ra b'isagika win ik dem, man ma sobijog soro kima b'isagika e okasit dem. <sup>6</sup> Si God opima riga yipayipa towanim mira tagoniny dem towaina omniki wiko ririrind. <sup>7</sup> God opima dadal ngirpu kesa yirkokar takainy dem towanim yepiya ra b'ogil mile omnika teyenanj muske wimenand, i ket odede gasa okatam oraka teyenanj, opi re b'ogil inyomarena kima gasa, i isnawa kima gasa, i dide itkika kesa gasa. <sup>8</sup> I riga yepiya ra towalenggyam b'uturowatenanj i ket God ma iminjog yitkak b'itisairanj, aji ra negirjog mile nena yimta undoka teyenanj, si God opima ten ukoi soro kima b'isagikand taramisiny dem dide ukoi soro ke tamniny dem. <sup>9</sup> I God opima bebig kima b'idgotnena dide b'iaena kima b'angnena takainy dem komkesa riga wa yepim re negirjog mile amnikenenanj, naska Ju riga wa pilwa i ket God ma obagiki kesa riga wa pilwa. <sup>10</sup> I kwa God opima Tina b'ogil inyomarena, i Tina isnawa, i dide Tina ngimbla takainy dem komkesa riga wa yepim re b'ogil mile amnikenenanj, naska Ju riga wa, i ket God ma obagiki kesa riga wa. <sup>11</sup> Mop nokip Godimna b'isagika re yipa ririrkip e komkesa riga wa pilind. <sup>12</sup> I komkesa God ma obagiki kesa riga



yepim re God ma gog kesa wekeny, dide negir mile amnikenenanj, si ton opima dadal ngirpu kesa uj taukanj dem. I dide komkesa Ju riga yepim re God ma gog kima wekeny, dide negir mile amnikenenanj, toda kwa opima negir ma b'isagika takatanj dem onggit gog yit ke. <sup>13</sup> Mop nokip God ma opima negir kesa dimdimjog riga nyi takainy riga wa yepim re gog yit jaba yipya nena ke utkondenenanj. Aji Ton towa mim takainy yepiya ra gog yit ririrind mile omnika teyenanj rina re Mose b'ingawa aramkinonj omnikam. <sup>14</sup> I kwa God ma obagiki kesa riga re ma God ma gog yit kima im. Aji ra ton Godimna oramiti kukip ke singi kima God ma gog mile omnika teyenanj, si ton re ma God ma gog yit kima riga im, aji towaina onggit kukip ke singi kaim gogim tamnikanj. <sup>15</sup> I opimemb gog yit iriki wekeny re God ma obagiki kesa riga waina gar nasim, si ton towaina gar ke wumir im onggityam gog yit. I kwa towaina kukip ke nonykokpim daka yir ungatenanj da onggityam gog yit re iminjog e. Si ton nony menamena ke angwatanenanj towa wingirind b'obogil b'isagikam dide b'irmekam nangga e b'ogili nangga e negir. I ingkaimemb ton opimemb towaina gog mile pitapita amnikenenanj. <sup>16</sup> Si ra God ma b'isagika bibir ik dem, God Keriso Yesu na ingau dem komkesa riga isagikam towaina wigawiga egurki mile gatab. Si Ton tesagikiny ra God ma b'ogil yirkokar bage yit kae dem rintre re kon pitapita omnena yiyenyin.

*Ju Riga waina Negir Mile*

17 Aji man Ju riga, man molenggyam b'agenat da “Kon Ju riga en, God ma obagendi riga en,” i man God ma gogind nony b'ijawa yoramitenyit, i dide man b'asourenyit da, “God re koina God e.” 18 I dide man kea gog yitim pilke b'ingawa akateninyit. Si onggit paemb man wumir mibnyit God ma singi rinsim re God emjateniny mornim omniam, i man ikalnena eyeninyit nangga im b'ogil dide negir. 19 I kwa man molenggyam danda kima yimjatenyit da, “Kon yirdidi riga wa wang iyena riga en, dide kon ngaya en towanim yepim re sibibind wekeny, 20 i kwa kon dimdim on-gonykena riga en korirkorir mile riga wa, dide kon towanim ouyaena riga en yepim re b'iga sobijog pila gog yit b'obogil b'auyaeni kesa wekeny,” mop nokip man gog yit kae kupka wumir dide iminjog yitkak okati mibnyit. 21 Si ket man riga auya-eninyit, aji nangga pae man maka molenggyam b'auyaenyit? I man yitkak pitapita yomnenyit da “Goro yurowam,” aji nangga pae man yurowam mile amnikeneninyit? 22 I man opurena eyeninyit da “Goro gigir dide yigyig b'iyena mile tamnikina,” aji nangga pae man gigir dide yigyig b'iyena mile amnikeninyit? I man danda kima apureninyit da “B'anyginena god aidol b'isaina,” aji nangga pae man gasa yurowam ke imda eyeninyit b'anyginena god aidol oramkapu metind. 23 I man yete re b'asourenyit da “Kon gog yit owama riga en,” aji man kwa gog yit erbeka eyeninyit. Si ingkaemb man Godind isnawa kesa gou wa yomnenyit. 24 Si God ma yina pebat ija emb ji yindenya da, “Win, Ju riga, wa ma paim ji God ma obagiki kesa rigap Godimna nyi yisadrenyi.”

<sup>25</sup> Si ra man gog yit yimta tundokinyit, moina God ma obagendi tirir omni mal wugim ipka mile re b'ogiljog e mornim. Aji ra man gog yit erbeka teyeninyit, si moina God ma obagendi tirir omni mal wugim ipka mile re kemb ongwata kesa ainy.

<sup>26</sup> Ra God ma obagendi tirir omni mal wugim ipki kesa rigat gog yitimna b'ingaena mile tawaminy, ringma, ma God awir e tin ogenai dem da ton re Tina obagendi tirir omni mal wugim ipki riga e?

<sup>27</sup> I Ju riga man b'asourenyit da “Gog yit iriki peba dide God ma obagendi tirir omni mal wugim ipka mile re kor mi,” aji madaka opima onggityam gog yit arbekeneninyit. Si ra get ke God ma obagendi tirir omni mal wugim ipki kesa rigat gog yit kupkakupka yimta tundokiny, ton men Ju riga, ita negir ma isagakam motiny dem, nokip man opima gog yit arbekeneninyit. <sup>28</sup> Mop nokip iminjog Ju riga re ma gim ke Ju riga mile omnika riga e. Dide kwa iminjog God ma obagendi tirir omni mal wugim ipka mile re ma gim ke jiwind God ma obagendi tirir omni mal wugim ipki e. <sup>29</sup> Aji iminjog Ju riga re kukip ke Ju riga mile omnika riga e. Dide kwa iminjog God ma obagendi tirir omni mal wugim ipka mile re ma gim ke kipearind omniki e aji gar kuwarind omniki e. Si God ma onggityam obagendi tirir omni mal wugim ipka mile okatam re wingawinga kae, aji ma iriki gog peba kae. Dide kwa onggit rigam pilind esourena re ma rigam pilkae ik aji Godim pilkae.

### 3

#### *Godimna Iminjog Tirir Omni Mile*

<sup>1</sup> Si ringma, opima God Ju riga pumb wa urowateniny dide God ma obagiki kesa riga gou wa amneniny? Ma ija im. Yipa ririr im. Si nangga b'ogil e yibim God ma obagendi tirir omni mal wugim ipka milem pilind? <sup>2</sup> I opima Ju riga wa pilind komkesa nya ke b'ogil gasa wekeny. Si naskajog b'ogil gasa re intemb ji da God ten nony ejainonj Tina yitkak towa yimind oramitam. <sup>3</sup> Si ringma, yepiya ra maka ra Godind gar ke utkunda ke okasi, onggityam towaina gar ke utkunda kesa milet ririr e God ma nony ijawa kima mile awir omnik? <sup>4</sup> Ka, ma ririr e! God b'ogla iminjogim yebim, aji komkesa riga re b'anyginena mile kima im. God ma yina peband ija emb ji iriki yibim da, “God! Ra Man Moina yitkak tapureninyit, Man b'ogla b'itimjasit da Man re negir kesa dindimjog et,

si ra Man b'isagika okasit, Man ita onggityam b'isagika gou wa omnyit.”

<sup>5</sup> Aji sin, Ju riga, kaokao mile im amnikenenindam, si ingkaemb God Tina negir kesa dindimjog mile pitakipind omnika yiyeneny. Si ringmim men nitinjindam? Aji kon rigaina opurena nya kae nitindeneyin. Ra God negir ma b'isagika oramiteny sin Ju riga wa pilind, si ita Godim pilind kaokao mile yibim? <sup>6</sup> Makwa ita! Ra odede tawik, God ridede wip e onggityam gowukoi isagika iyeny dem? <sup>7</sup> Ninda rigap ama rika ita b'arkita oramitenyi odede da, “Aji kon opima b'anyginena mile amnikeneninyin. I ingkaemb Godimna iminjog mile warabag auka yikeny, dide Tina b'ogil inyomarena b'usmureneny. Si nangga pae kon kwa negir ma b'isagika okasin

dem?" <sup>8</sup> I kwa ninda rigap nisadrenenanj odede da men re odede opurena riga im da, "Men negirjog mile ramnikinum, nokim da idenat ket Godimna b'ogil mile pita taukanj." Si men ririr im towaina isadrena iminjog ke okasu? Ma ririr e! B'anyginena e! Si odede rigap opima negir ma b'isagika iminjog takatenanj dem towaina mile ririrind.

*Makwa Yipa Ita Dimdimjog Riga*

<sup>9</sup> Si ringma, sin Ju riga pumb wa im wekenyin, aji God ma obagiki kesa riga re gou wa im? Makwa ija e! Kon ke naska pitapita yomnenyin meranim da, Komkesa Ju riga dide komkesa God ma obagiki kesa riga negir mile wira nasim wekeny. <sup>10</sup> Si ija emb ji yina peband iriki yibim da, "Makwa yete negir kesa dimdimjog riga yibim, makwa ita yete.

<sup>11</sup> I dide makwa ita yete nony menamena ke yinayina gasa epindeniny, i dide makwa ita yete Godind oraka yiyeny.

<sup>12</sup> Komkesa rigap re yipa nasim Godind kak yiaenyi dide wip aukenenanj negir mile wa im. Si makwa ita yete dimdimjog b'ogil mile amnikeniny, makwa ita ngai yipa riga.

<sup>13</sup> I negir yit opurenam towaina tugim ipangendi re ija im opi re ipangendi gop euki re dide. I towaina weyat engaenenanj re b'anyginena yit opurena mim.

I towaina tu bora ke uj kima yit im opendenenanj odede it re giremimna negir guda re dide.

- 14 I dide towaina tu borand negir sake dide negirjog gar bebig yit im yindangir wekeny.
- 15 I towaina pis re sam kima im wanakana b'ikenenanj riga kus kima ongandam.
- 16 Si ritamimta re ton wuweny, ton opima gasa negir omnika mile dide b'idgotnena mile riga wa amnikaenenaurationj.
- 17 I ton ma wumir im wekeny ringma ngimblam nya.
- 18 I kwa towa yirind awir e Godind moga kima yisnai.”
- 19 Si men wumir im da nangga ma re God ma gog yitit yindeney re towa maemb ji, yepim re God ma gog wirand wekeny. Nokim da idenat ket onggit gogit komkesa tugim mumakesa tamnikiny, dide komkesa gowukoi riga kupkakupka teyeniny Godim pilwa Tina negir ma b'isagika wirand. 20 Si onggit paemb da komkesa riga ma ririr im gog yit yimta undoka ke negir kesa dimdimjog riga nyi okatam Godim wipind. Komkesa makwa ririr im. Mop nokip onggit gog yitte ket riga wumir amneneniny da nanggamog negir mile im wekeny towaina garind.

*Gar ke Utkunda Nena kae Negir kesa Dimdimjog Mile*

- 21 Aji yu God negir kesa dimdimjog mile pita yommeneny re ma Tina gog yit yimta undoka kae, aji gar ke utkunda kae. I onggityam negir kesa dimdimjog mile re kea kesam pebap, opi re gog peba dide bageyam waina pebap, yimjateneno ririrkip aukam. 22 I God Tina onggityam negir kesa dimdimjog mile agoniny komkesa riga wa

yepim re gar ke utkunda aramkiranj Yesu Kerisom pilind. God ija imemb negir kesa dimdimjog mile agoniny komkesa riga wa, nokip Ton riga yipa ririr im amnikiny. <sup>23</sup> Mop nokip riga ma ririr im God ma b'ogil inyomarena okatam, komkesa re kutjog im, nokip komkesa riga re negir mile omnika riga im. <sup>24</sup> Aji God Tina wurar kae mira kesa jabajaba negir kesa dimdimjog riga nyi agoneneniny riga wa Keriso Yesum nyi kima, nokip Keriso Yesu kea Godim pilwa Tina kus ke negir mile iraba mira yokawonj. <sup>25</sup> I God naska nata itemb Keriso Yesund yoramitonj negir mile irabika si b'anggam Tina negir kesa dimdimjog mile ouyawam. Si yepiya ra Yesu ma kusind gar ke utkunda oramisi, God opima towaina omniki negir mile teomeneniny. I God kwa naska winind rigaina omniki negir mile egoukeninonj. Si ingkenaemb God yitaikenonj da, "Kon re negir kesa dimdimjog mile God en." <sup>26</sup> Si yu winind, God yitaikeny Tina negir kesa dimdimjog mile onggit ma paemb da Ton re negir kesa dimdimjog God e, i dide kwa Ton negir kesa dimdimjog riga nyi im agoniny riga wa yepim re Yesum pilind gar ke utkunda yoramisi.

<sup>27</sup> Si ringma, men ririr im b'atisourenindam? Ma ririr im! Si nangga gog kaim? Rika gog yit yimta undoka kaim, o minda rigaina ninda b'ogil mile omnika kaim? Nayi, gar ke utkunda gog nena kaim. <sup>28</sup> Mop nokip men wumir yokatenyu da rigap negir kesa dimdimjog riga nyi emdanj re Yesund gar ke utkunda nena kaim, aji ma gog yit yimta undoka kaim. <sup>29</sup> Ringma, minda rika God re Ju riga nena ma God e? Nayi, ma ija e. Si ringma, rika ma God Tina obagiki kesa riga wa God e? Si

owi, Ton re kwa iminjog towada God e Tina obagiki kesa riga wa. <sup>30</sup> Si God re yipaina nena God e, si onggit paemb Ton gar ke utkunda mile kaim negir kesa dimdimjog riga nyi agoniny Tina obagendi tirir omni mal wugim ipki riga wa. I dide Ton kwa onggit yipaina gar ke utkunda mile kae negir kesa dimdimjog riga nyi agoniny Tina obagendi tirir omni mal wugim ipki kesa riga wa. <sup>31</sup> Si ringma, minda rika men onggityam gar ke utkunda mile mapaim gog yit awir amnikenenindam? Ma ririr e! Aji men onggit gar ke utkunda mile kae gog yit danda kima amorkenenindam.

## 4

### *Abraam Gar ke Utkunda kena Negir kesa Dimdimjog Riga Nyi Yokatonj*

<sup>1</sup> Rija im men nitinjindam sowaina kus ke dad Abraamimna odari gasa gatab? <sup>2</sup> Rako Abraam tina mile omnika ke negir kesa dimdimjog riga nyi yokatonj, ton keako ririr na b'asourenam. Aji ton ma ririr na Godim wipind b'asourenam. <sup>3</sup> Mop nokip God ma yina pebat ija emb yinj da, "Abraam Godind gar ke utkunda ke yokatonj, si God ti yinjatawonj da 'Man re negir kesa dimdimjog riga et.'" <sup>4</sup> Ra yipa rigat tina wiko rigam wiko mira okau, si rigap ma ita onggityam wiko mira ogenai da, "Itemb re tina wurar e." Aji ton b'ogla onggityam wiko mira yakau. <sup>5</sup> Aji God negir mile kima riga wa jabajaba negir kesa dimdimjog riga nyi agoneniny. I ra yipa rigat maka ra nangga wiko omnik aji Godind gar ke utkunda ke okas, si God ita onggit rigamna gar ke utkunda injatau da, "Itemb re negir kesa dimdimjog mile e."



<sup>6</sup> I Dawid toda kwa yipa ririr yitkak na apureninonj towanim b'ogil onnam gatab, yepim re maka nangga wiko im amnikanj, aji God jabajaba ten agenainy da, “Ton re negir kesa dimdimjog riga im.” Si yina peband ija emb ji iriki yibim da,

<sup>7</sup> “Ton re b'ogil omni riga im ji yamim re God awir amnikainy towaina gog yit erbeka mile dide Ton kwa ekangindainy towaina negir mile.

<sup>8</sup> Ton re b'ogil omni riga e yama ra Yonggyam maka nony iyenainy tina negir mile.”

<sup>9</sup> Rika onggityam b'ogil onnam re God ma obagendi tirir omni mal wugim ipka mile riga towanim oramiti e, o rika kwa God ma obagendi tirir omni mal wugim ipki kesa riga towanim da oramiti e? Owi, towanim da oramiti e. Si nok paemb men nindenindam da, “Re God yir yiyenonj Abraamna gar ke utkunda, si ti yokawonj negir kesa dimdimjog riga nyi.”

<sup>10</sup> Ridede na dide ridenat God tin yir yiyenonj dide ti yokawonj negir kesa dimdimjog riga nyi? Ringma, rika ton ke naskand God ma obagendi tirir omni mal wugim ipka mile yokatonj, o minda rika yimta kena yokatonj? Ton maka God ma obagendi tirir omni mal wugim ipka mile yokatonj naskand, aji yimta kena yokatonj. <sup>11</sup> Si re ton maka God ma obagendi tirir omni mal wugim ipka mile yokatonj, ton kea gar ke utkunda ke yokatonj negir kesa dimdimjog riga nyi. I God yimta ke tin youtintonj Tina obagendi tirir omni mal wugim ipka mile ke da ton re kea negir kesa dimdimjog mile riga e. Mop nokip God singi na da idenat Abraam komkesa gar ke utkunda rigaina b'u

tainy towa wingirind yepim re God ma obagendi tirir omni mal wugim ipki kesa wekeny, dide kwa idenat God towa negir kesa dimdimjog riga nyi takainy. <sup>12</sup> I God re kwa Tina obagendi tirir omni mal wugim ipki riga wa b'u e. Mop nokip ton re ma God ma obagendi tirir omni mal wugim ipka mile nena e yokatenyi, aji kwa ton yimta yundoki re mera b'u Abraamimna lomena e rina re ton gar ke utkunda ke Godind yimta yundokonj, re ton maka God ma obagendi tirir omni mal wugim ipka mile yokatonj.

### *Abraam God ma Tirir Omni Yit Yokatonj*

<sup>13</sup> God tirir omni yit akainonj Abraam dide tina kus ke b'igawar wa pilwa da, "Abraam re gowukoi owabinta riga e." God ma onggityam tirir omni yit re ma Mosemna gog yitim pilke na ikonj, aji negir kesa dimdimjog milem pilkena rina re ton gar ke utkunda ke yokatonj. <sup>14</sup> Mop nokip ra gog yit yimta undoka rigap onggit tirir omni yit owabinta riga tauranj, si gar ke utkunda mile ra kip kesa e tainy. Dide itemb God ma tirir omni yit re kemb awir yomnonj. <sup>15</sup> Mop nokip gog yitit wiko yii re God ma ukoi soro kima b'isagikam e. Si rada gog yit maka tekeny, gog yit erbeka mile toda makwa opima taukanj. <sup>16</sup> Si onggit paemb itemb tirir omni yit re gar ke utkunda kae yokatenyi, nokim da idenat itemb tirir omni yit God ma wurar wirand ibim. Itemb God ma tirir omni yit re wurar kae ik, nokim da idenat komkesa Abraamimna b'igawarip b'obogil okatenyi onggityam tirir omni yit. Si itemb God ma tirir omni yit re ma towanim nena mim yepim re gog yit awamanj, aji kwa

odede riga wa mim yepim re Godim pilind gar ke utkunda yoramitenyi Abraam re dide. Si Abraam re mera komkesa riga wa b'u e. <sup>17</sup> Si ija emb ji yina peband iriki yibim da, “Kon mobagendond re jogjog yitam riga wa b'u mana.” I Abraam gar ke utkunda yoramitonj onggit Godim pilnat yete re uj riga yilo amnikeneniny dide yete re otobarki kesa gasa odede yipa wip ke ara emokeneniny otobarki gasa re dide. <sup>18</sup> Abraam wip ke yokatenonj re warim b'ogil isma kesa gasa na, aji ton Godim pilind gar ke utkunda yoramitonj warim b'ogil isma okatam. Nokim da idenat ton jogjog b'engabenga yitam riga wa b'u tainy nokip God kea odede yindonj da, “Moina b'iga ra odede jogjog im b'utusmurenanj dem.” <sup>19</sup> Abraamim kemag re momta andred (100) na yibnawonj, si ton kea wumir na da tina ji re kea uj riga pila na yibnonj, dide ti kongga Saramna b'iga wimenapu kipear kea toda kwa oparkito. Aji tina gar ke utkunda makwa ngai danda kesa awonj. <sup>20</sup> Si ton maike God ma tirir omni yit gatab nony nimognimog awonj. Dide ton makwa ngai gar ke utkunda kesa mile amnikinonj. Aji ton kea itemb tina gar ke utkundand danda kima onyitenenonj, dide ket Godind b'ogil inyomarena yokaeenenonj. <sup>21</sup> I dide Abraam danda kima iminjogim yommenonj da, “God ita Tina danda ke Tina tirir omni yit notinkau.” <sup>22</sup> Onggit penaemb God Abraamimna gar ke utkunda gatab yimjatawonj da, “Itemb re moina negir kesa dimdimjog mile e.” <sup>23</sup> Si ija emb ji iriki yibim yina peband da, “God yimjatonj da ton re negir kesa dimdimjog riga e.” Onggityam iriki re ma Abraam nena mim.

24 Aji kwa mera mim yamim re God negir kesa dimdimjog riga nyi nogoniny, nokip men kemb gar ke utkunda yoramisu Godim pilind yet re mera Yonggyam Yesund uj ke yutnyitonj. 25 Godit Yesund yoramitonj uj okatam meraina negir mile awir omniam, dide tin uj ke yutnyitonj mera negir kesa dimdimjog riga nyi okawam.

## 5

### *Negir kesa Dimdimjog Riga ma Isma Mile*

1 Si onggit paemb men onggityam ngimbla yawamu God kima, nokip men Godim pilke negir kesa dimdimjog riga nyi yokatenyu re gar ke utkunda kae. Mop nokip mera Yonggyam Yesu Keriso kea Tina kus ke itemb ngimbla yoramitonj men dide God ganggand. 2 Si Yesu Keriso itemb ngimbla yoramitonj re meranim okata mana. I dide kwa men kea gar ke utkunda yoramitonda Ti pilind. Si onggit penaemb Ton niyeninonj God ma wurarim pilwa. Si men yu onggit wurar nasim wekenyin. I dide men ukoi sam kima e yir yungau warim b'ogil isma rina ra God meranim Tina b'ogil inyomarena yingg iyeny dem. 3 Si men ma inta b'ogil nena yir ungau, aji men kwa ukoi sam omnikenenyu ukoi b'idgotnena wingirind rina re men yokatenyu Yesund yimta undokand. Mop nokip men wumir im da onggityam ukoi b'idgotnena kae men okatenyu musik wimena. 4 I kwa onggit musik wimena kae men okatenyu b'idgotnena okatenam danda rina ra God iminjogim notineniny. I dide kwa onggit b'idgotnena okatenam danda kae men

okatenyu warim b'ogil isma. <sup>5</sup> Onggit warim b'ogil ismat ma ita ingarim notinkenening. Mop nokip Yinayina Wingawinga rina re God nokainonj, Tonte God ma singi b'iyena mile ke meraina gar yindangir tamnikeneniny. <sup>6</sup> Mop nokip re men wingawinga ke danda kesa wekenenond, God ma obagendi winind Keriso kea uj awonj mera map yepiya re men Godim ewangaya kesa wekenond. <sup>7</sup> Si ma ita rigat uj okas dindimjog riga map, itemb re ukoi jog bebig e. I dide ita rika yama yipa rigat moga kesa uj okas b'ogil mile riga map. <sup>8</sup> Aji re men negir milend wekenond, Keriso mera map uj awonj. Si ingkenaemb God onggityam Tina get ke iminjog gar ke singi b'iyena mile meranim yitaikenonj. <sup>9</sup> I yu men itemb Keriso Tinajog kus kaim negir kesa dindimjog riga nyi okati wekenyin. Si onggit paemb ra God ma kikitum b'isagika win ik dem, God ita Kerisond ingau dem mera yirkokar okawam Godimna ukoi soro kima b'isagakam pilke. <sup>10</sup> Mop nokip re men Godim geja riga wekenond, itemb God ma B'iga kea uj yokatonj, i ingkenaemb men God kima rigariga aukitondam. Si yu men ket God kima rigariga im wekenyin. Si ringma, ma men iminjog imjasu da ita men yirkokar okasu dem Kerisomna yirkokarim pilke, mop nokip Keriso kea utnyitonj? <sup>11</sup> Si ma onggit nena e. Aji men yu kwa Godim pilnasim ukoi sam yomnikenenyu mera Yonggyam Yesu Keriso map, mop nokip Ton kea men God kima rigariga nomninonj.

*Adamim pilke Uj dide Yesum pilke Yirkokar*

12 Si onggit paemb negir mile b'atobarkonj onggit gowukoyind re yipa rigam pilkena, dide onggit negir mile kenaemb uj b'atobarkonj. Si odede nya kaim komkesa riga negir mile amnikenenanj, i dide onggit paemb uj toda kwa komkesa riga wa pilwa yikeneny. 13 Nokip gowukoi otomapu ke ngirpu re gog yit pita awonj, si onggit ganggand negir mile omanda yibnonj dikind gowukoyind. Aji God maka onggityam negir mile negir ma b'isagikam agenkinonj, nokip gog yit maike wekenonj b'isagikam. 14 Aji riga yepiya re wekenonj Adamim winind ngirpu re ket Mose riga wa gog yit akainonj, ton maka odede wip negir mile amnikenento rina re Adam yomnikonj. Aji ujit ten wip eyeninonj towa wingirind. Si itemb Adamimna wingata re Ton kima yipa wip e yet re yimta ikonj.

15 Aji onggit yimta meni Rigam pilke yiyag wurar re ma ija na it re Adamimna negir mile re dide. Mop nokip onggit yipa rigamna otomi negir mile kaim jogjog rigap uj yokatenyi. Aji Godimna wurar dide yiyag wurar rina re yipa riga Yesu Kerisomna wurar ke tetkonda, tonsiemb ji ukoi jog warabag auka ekenya jogjog riga wa pilwa yepim re Yesund gar ke utkunda ke yokatenyi. 16 I kwa itemb yiyag wurar re ma ija e it re ringma re onggit yipa rigamna negir mile pilke aukonj. Mop nokip onggit yipaina negir mile isagikat riga eyeniny re negir ma b'isagika wa im, aji itemb yiyag wurar re jogjog gog yit erbeka mile awir omnika mana aukonj dide ket riga eyeniny de negir kesa dimdimjog riga nyi okawam. 17 Mop nokip naska onggit yipaina rigat kea gog yit er-

beka mile yomnikonj dide onggit yipaina riga ma paemb ji ujit komkesa riga wip eyeniny, aji jogjog rigap itemb God ma ukoi jog wurar dide negir kesa dimdimjog milemna yiyag wurar ma sobijog im ket takatenanj, i kwa onggit paemb ton b'ogla iminjog yirkokar wimenam wip b'itienanj onggit yipa rigamna danda ke it re Yesu Keriso. <sup>18</sup> Si onggit paemb ket yipaina gog yit erbeka milet komkesa riga eyeniny de negir ma b'isagika wa. I kwa odede yipa wip nya kaemb yipaina negir kesa dimdimjog mile omnikat toda kwa komkesa riga wip eyeniny negir kesa dimdimjog riga nyi ogonam rinte re riga wa yirkokar agoniny. <sup>19</sup> Mop nokip ija naemb ji yipa riga ma utkunda kesat jogjog riga negir mile wa aramisinonj, i kwa odede yipa wip nya kaemb yipa riga ma utkundat jogjog riga negir kesa dimdimjog mile wa taramisiny dem. <sup>20</sup> Si onggit penaemb God Tina gog yit aramkinonj, nokim da idenat Tina gog yitip riga wa wumir warabag omnika teyenaورانj da, "Men re gog yit erbeka riga im." Aji rokate re onggityam negir mile b'usmureneny, God ma wurar toda kwa ita ukoi kana b'usmureneny. <sup>21</sup> Nokim da idenat itemb God ma wurarit kwa mera Yonggyam Yesu Kerisomna omniki mile ke riga wip teyeniny negir kesa dimdimjog mile wa, i dide riga teyeniny de dadal ngirpu kesa yirkokar wa. Si odede yipa wip nya kenaemb naskand negir milet wip eyeninonj dide ket riga eyeninonj uj wa.

## 6

*Negir Milem pilke Uj dide Kerisom pilke Yilo*

<sup>1</sup> Si men ridede im nitinjindam? Si ringma, men b'ogil im negir mile omnikand tekenenyin, nokim da idenat God ma wurar b'utismureneny?  
<sup>2</sup> Makwa ririr e! Men kemb uj aukitondam negir milem pilke. Si ringma, ririr im men b'usaya kwa yilo tekenenyin onggit negir milend? <sup>3</sup> Si ma win wumir im da men komkesa baptiso yokatonda re Keriso Yesu kima yipand awou mana? Si men onggityam baptiso yokatonda re tina uj kima yipand awowim mana. <sup>4</sup> Si onggit paemb re men baptiso yokatonda Kerisomna uj kima yipand awowim, men kea ton kima yipand gop wa niglinonj. Nokim da idenat men sisil yirkokarind menon okasu, odede yipa wip it re naskand Keriso utnyitonj Abumna b'ogil inyomarena ke. <sup>5</sup> Mop nokip re men yipand autondam Tina uj kima, i men kwa b'ogla Ton kima yipand taukindam dem Tina utnyita kima. <sup>6</sup> Si men ija imemb ji wumir da mera kukipind get ke negir mile riga Keriso kima im yipand wul b'agbagind idriki wekeny. Nokim da idenat meraina onggityam negir mile kima ji negir omniki tekeny, dide kwa idenat men maka b'usaya negir milemna wiko riga taukindam. <sup>7</sup> Mop nokip yet ra Yesu kima yipand uj okati ibim wul b'agbagind, God kea tin negir milem pilke yitraronj. <sup>8</sup> Aji rada men kea uj yokatonda Keriso kima, si men kemb odede gar ke utkunda ke yokasu da men kwa opima ton kima yipand yilo tekenenyin dem. <sup>9</sup> Mop nokip men wumir im da Keriso ke uj ke utnyitonj, si onggit paemb Ton makwa ririr e b'usaya uj okas, dide ujit makwa ririr e b'usaya Tinim yonggyam tainy. <sup>10</sup> I Keriso



yipapayam uj awonj re rigaina negir mile ngirpu kesa dadal awir omna mana. I dide daka Tina yilo wimena yirkokar re Godind ewangaya ma.

<sup>11</sup> Si widaka kwa walenggyam b'adgenaindam yipa wip odede da, “Men kea uj aukitondam negir milem pilke. Aji men ket Keriso Yesu kima im yipand yilo wekenyin Godind ewangayam.”

<sup>12</sup> Si onggit paemb goro kwa negir milet wip reyenin waina ji rinsim ra yimta ke uj taukanj dem, mop nokip ke negir milet wen wip ramnin onggityam jiwimna negir singi yimta undokam.

<sup>13</sup> Si win goro kwa tengaeninam waina kipear negir mile omniam negir kaokao ingaena gasa pila. Aji win kea ujim pilke itektondam de yirkokar wa. Si onggit paemb win b'ogla walenggyam b'atkaindam Godind ewangayam, dide waina jiwind kipear kwa tengaindam Godind ewangayam, nokip waina jiwind kipear re negir kesa dimdimjog mile omniam ingaena gasa im. <sup>14</sup> Mop nokip win ma gog yit wira nasim wekenyit, aji God ma wurar wira nasim wekenyit. Si onggit paemb negir mile ma ririr e wa yonggyam tainy.

### *Negir kesa Dimdimjog Milemna Wiko Riga*

<sup>15</sup> Si men nangga e omniku? Ma men negir mile im tamnikindam, nokip men ma God ma gog wira nasim wekenyin, aji God ma wurar wira nasim? Makwa ririr e! <sup>16</sup> Ma win wumir im da ra win walenggyam b'atkaindam yipa rigam pilwa tin yit utkundam tina wiko riga pila, si win kea tina iminjog wiko riga im aindam yena re win yit yutkundenenya? Ra win negir milemna wiko riga taindam, si win uj e okasya dem. O ra win God

ma yit utkunda riga taindam, si win negir kesa dimdimjog mile e okasya dem. <sup>17</sup> Aji uko i siteket Godim pilwa! Mop nokip naskand win re negir milemna wiko riga na wekenot. Aji win kea gar ke b'obogil yutkundenenonda dide yimta yundokenenonda God ma itemb kupka ouyaena yitkak rina re rigap wanim b'isatena yiyeno. <sup>18</sup> Si win kea b'itrarkitondam negir milem pilke, dide negir kesa dimdimjog milemna wiko riga na aukitondam. <sup>19</sup> I kon nitindenyin rigaina opurena nya kae, nokip waina get ke wumir re kut im. Win naskand kilkil mile dide negirjog milemna wiko riga na wekenot. Si win kea waina kipear engaentondam negirjog mile omniam. Aji otade win negir kesa dimdimjog milemna wiko riga im wekenyit. Si win b'ogla waina kipear engaeninam yinayina mile omniam odede ringma na re win naskand waina kipear engautondam. <sup>20</sup> Mop nokip re win negir milemna wiko riga wekenot, si win negir kesa dimdimjog milem pilke b'itrarki riga na wekenot. <sup>21</sup> Si ringma, onggit winind win nangga b'ogil kip na eaktondam? Aji yu win onggityam waina omni ki gatab ingar im ainindam, mop nokip win kemb wumir aindam da onggityam milemna kikitum isma re uj e. <sup>22</sup> Aji yu win negir milem pilke b'itrarki im wekenyit, dide God ma wiko riga im wekenyit. Si ingkaimemb win waina yinayina mile kip eakindam. I itemb kikitum isma re dadal ngirpu kesa yirkokar e. <sup>23</sup> Mop nokip negir milemna mira re uj e, aji Godimna yiyag wurar re ngirpu kesa dadal yirkokar e rinte re yibim Keriso Yesu mera Yonggyamim pilind.

## 7

*God ma Gogim pilke B'itraram*

<sup>1</sup> Kor nany dide yingganwar! Kon nitindenyin towanim ma yepim re God ma gog yit wumir wekeny. Ke win wumir aindam da itemb God ma gog yitit rigand wip iyeny ra tina wimena yirkokar ngirpu wa e? <sup>2</sup> Si kon yipa wingata yit e nitindenyin. Yipa leo kima kongga re gog ke ti leom pilind ijobiki o wibim ti leo ma wimena yirkokar ngirpu wa. Aji ra ti leo uj tainy, ton kemb b'itrar onggit gogim pilke rinto re ti leom pilind ijobiki wibim. <sup>3</sup> Si onggit paemb ra itomb ji leo kima konggamna leo yilo ibim, i onggit konggat b'enga riga kwa okas ti leom, si komkesa rigap tin b'ogla togenai da itomb re gigir dide yigyig b'iyena mile kongga o. Aji ra ti leo uj tainy, ton kemb b'itrari o wibim onggit ijobiki gogim pilke. Si rada ton b'enga riga kwa okas ti leom, si itomb re ma gigir dide yigyig b'iyena mile kongga o. <sup>4</sup> Kor nany dide yingganwar! Wida kwa odede yipa wip nya kena uj aukitondam yipand Kerisomna uj kima. Si win ingkenaemb God ma gogim pilke b'itrarkitondam wanim yipand awowim onggit b'enga Riga kima yet re uj ke utnyitonj, nokim da idenatemb men kip kima taukindam Godind ewangayam. <sup>5</sup> Mop nokip men re naskand gim ke gowukoi riga na wekenond, i gog yitit negir milemna singi pita wa apekeneninonj. I ket onggit negir milemna singit meraina kipear engaeneninonj. Si ingkenaemb men uj awowim kip amnikentondam. <sup>6</sup> Aji yu men b'itrarki im wekeny in onggit gog yitim pilke, nokip men kea onggit gogimna ijobiki kima uj

aukitondam. Si onggit paemb men Godind yewan-gaenenyu Yinayina Wingawingamna sisil nya ke, aji ma kesam iriki gog yitimna nya kae.

### *God ma Gog dide Negir Mile*

<sup>7</sup> Si men ridede im ket nitinjindam? Ringma, rika God ma gog negir mile e? Nayi, ma ija e. Rako maka God ma gogit nouyaeniny, ma rako kon wumir na nibnyin nangga e negir mile. Odedemb da rako God ma gog maka yindeny da “Goro nonygor,” ma rako kon wumir na nibnyin nangga e nonygor. <sup>8</sup> Aji onggit God ma b'ingawa yitte nomneny da “Goro nonygor,” i ingkaemb ket negir millet gangga yokateny dide komkesa nonygor mile kor pilind urneniny. Onggit paemb ra gog yit maka ra tekeny, negir mile ma ririr e wiko omniam. <sup>9</sup> Si re kon gog yit wumir kesa nibnond, kon gim ke yilo na nibnond. Aji re God ma b'ingawa yit kor pilwa ikonj, si onggit b'ingawa yitit nouyaenonj negir mile gatab kor garind, si kon ket uj yokatond. <sup>10</sup> I kon ija na pop nony awond da “God ma b'ingawa yitit yirkokar e nitiyau,” aji kon yodarond itemb God ma b'ingawa yit re kornim uj mana. <sup>11</sup> Mop nokip re itemb God ma b'ingawa yitit wumir nomnenonj, i ingkenaemb ket negir millet gangga yokatenonj dide ket rabem nomnenonj, si onggit b'ingawa yitit ujim nomnonj. <sup>12</sup> Si onggit paemb gog yit re yinayina e. I God ma b'ingawa yit re kwa yinayina e, i negir kesa dimdimjog e, i dide b'ogiljog e.

<sup>13</sup> Si ringma, rika itemb b'ogiljog gasa aukonj kornim uj mana? Ma ija e! Aji onggit b'ogiljog

gasat kea ken ujim nomnonj, si ingkenaemb ket kon yongwatond da nangga e negir mile. I onggit b'ingawa yitit wumir nomnonj da koina mile re uj mim. Nokim da idenat kon b'obogil b'atingwatenyın da itemb koina mile re ongwata kesa ukoi jog negir mile im.

### *B'ogil Mile Omnı kam Gar Bebig*

<sup>14</sup> Mop nokip men wumir im da gog yit re wingawinga gasa e aji kon re gim ke gowukoi riga en, si onggit negir milet nokatonj re tina wiko riga wımena mana. <sup>15</sup> Kon ma ita angwateninyın nangga im re kon amnikeninyın. Mop nokip kon ma opima amnikeninyın b'ogil gasa rinsim re kon singi en omnı kam, aji kon opima amnikeninyın negir gasa rinsim re kon ma singi en omnı kam. <sup>16</sup> Rada kon tamnikeninyın nangga im re kon ma singi en omnı kam, si kon ket imjasın da gog yit re b'ogil jog e. <sup>17</sup> Si opimemb negir gasa ma kolenggyam im amnikeninyın, aji negir milete rınte re kor pilind wımena yikeny. <sup>18</sup> Mop nokip kon wumir en da awir e kwa nangga b'ogil jog gasa e yibim kor pilind, de koina gim ke gowukoi rigam pilind. Mop nokip kor ita singi onggityam b'ogil jog gasa omnı kam, aji omnika awir e kwa yibim kor pilind. <sup>19</sup> Nokip kon ma opima amnikeninyın opimemb b'ogil jog gasa rinsim re kon singi en omnı kam, aji kon opima amnikeninyın opimemb negir gasa rinsim re kon ma singi en omnı kam. <sup>20</sup> Aji rada kon opima amnikeninyın nangga im re kon ma singi en omnı kam, si onggityam gasa ma kolenggyam im amnikeninyın, aji negir milete rınte re kor

pilind wimena yikeny. <sup>21</sup> Si kon itaemb ji yir yongenenyin yipa gog, it re da kor pilind ita b'ogiljog gasa omnika singi yibim, aji daka negir gasa omnika singi indama toda kwa yibim kor pilind. <sup>22</sup> Nokip kon koina kukip rigam pilke ukoi sam e yomnikenenyin God ma gog yimta undokam. <sup>23</sup> Aji kon kwa yir yongenenyin yipa b'enga gog rinte re koina gim ke kipearind yibim, dide ipowa yiyeny koina kukip ke nony menamenamna gog, i dide tontemb nugongateny dide niyeny negir mile omnika ma gog wingir wa rinte re yibim koina gim ke kipearind. <sup>24</sup> O! Kon ma sobijog gar bebig kima riga en! Koina gim ke jiwit ita winind negir mile amnikeneniny, i onggityam isma re uj e. Si yete ken onggityam uj ke nititringenj? <sup>25</sup> Aji Godim pilwa siteket, nokip mera Yonggyam Yesu Keriso kea ken nitringendonj onggit negir milemna gogim pilke. Si onggit paemb kon kolenggyam kukip ke re God ma gog wiko omnika riga en, aji gim ke gowukoi riga re negir milemna gog wiko omnika riga en.

## 8

### *Yinayina Wingawingam pilke Yirkokar*

<sup>1</sup> Si onggit paemb da makwa ita yipa negir ma b'isagika onggit riga wa pilind yepim re gar ke utkunda ke Keriso Yesum pilind wekeny. <sup>2</sup> Mop nokip yet ra man Yesu Kerisond gar ke utkunda ke okasit, Yinayina Wingawingat kea yirkokar mokau. Si onggit Tina gogit Keriso Yesu map men mitraronj negir mile dide ujimna gogim pilke. <sup>3</sup> Mop nokip gog yitit ma ririr e yirkokar

okawam, nokip gim ke gowukoi riga re danda kesa e kupka gog yit yimta undokam. Si God negir mile awir omniam yitmikitonj Tinajog B'iga yipa wip odede it re negir mile kima gim ke gowukoi riga re dide. I God ket rigaina negir mile map negir ma b'isagika yomnikonj onggit Tina B'iga ma jiwind. <sup>4</sup> Nokim da idenat negir kesa dimdimjog mile rinsim re gog yitit nerkeniny omniam, ririrkip taukanj mera pilind yepim re men maka wimena wuweny in gim ke gowukoi rigaina singi ririrind aji Yinayina Wingawingamna singi ririrind. <sup>5</sup> Mop nokip riga yepim re towaina gim ke gowukoi rigaina mile singind wimena wuweny, ton nony menamena amnikenenanj re towaina gim ke gowukoi rigamna gasa mim, aji riga yepim re Yinayina Wingawingamna singind wimena wuweny, ton nony menamena amnikenenanj re Yinayina Wingawingamna gasa mim. <sup>6</sup> Nokip gim ke gowukoi rigam pilke nony menamenat riga wip teyeniny ra uj waim, aji Yinayina Wingawingam pilke nony menamenat riga wip teyeniny ra yirkokar dide ngimbla wa im. <sup>7</sup> Mop nokip gim ke gowukoi rigam pilke nony menamena re Godim geja riga e. Mop nokip onggit nony menamena ke riga ma opima gog yit yimta tundokenenanj i kwa daka ton makwa ririr im yimta undokam. <sup>8</sup> Riga yepim re gim ke gowukoi rigamna singind wekeny, ton ma ririr im Godind sam okawam. <sup>9</sup> Aji ra Godimna Wingawinga wimena ikeny waina garind, win ma opima tekenyit gim ke gowukoi rigamna singind, aji Yinayina Wingawingamna singi nasim. Yet ra maka Kerisomna Wingawinga okas, itemb riga

re ma Tina riga e. <sup>10</sup> Aji rada Keriso ita wa pilind yibim, waina ji ra uj im taukanj negir mile map, aji Yinayina Wingawinga re yirkokar e wanim. Mop nokip Kerisomna negir kesa dindimjog mile ita yibim win kima. <sup>11</sup> Si God kea Yesund yutnyitonj uj ke dide Tina Wingawinga ita yibim wa pilind. I God yet re Kerisond uj ke yutnyitonj, Ton Tina Wingawingand yingaeny yirkokar ogonam waina itkiki jiwim yete re wimena yikeny wa pilind.

<sup>12</sup> Kor nany dide yingganwar! Si onggit paemb men goro kwa gim ke gowukoi rigaina wip b'amnena ririrind wimena mile yimta rundokinum, aji b'ogla Yinayina Wingawinga ma wip b'amnena nena yimta rundokinum. <sup>13</sup> Mop nokip ra win gim ke gowukoi rigaina singind wimena tuwenyit, win iminjog opima uj taukindam. Aji ra win Yinayina Wingawingand yimta undokya i ingkaim win tepoindam gim ke gowukoi rigamna singi mile, si win yilo im tekenyit. <sup>14</sup> Mop nokip riga yepim re Godimna Wingawingat wip eyeniny, ton re Godimna b'iga im. <sup>15</sup> Mop nokip Yinayina Wingawinga rina re God wa akainonj, Ton ma opima wen b'usaya wiko riga tamnikiny moga okawam, aji Tonit wen Godimna okati b'iga amninonj. Si men onggit Yinayina Wingawingam pilkaim b'okta arara aenenindam da, "Abu! Abu!" <sup>16</sup> I Yinayina Wingawingate tilenggyam meraina wingawinga kima yipand gilgil iminjog pita amneneniny da, "Men re God ma b'iga im." <sup>17</sup> I rada men Tina b'iga im autondam, si men re kea Tina owabinta riga im. I kwa rada men opima iminjog Keriso kima yipand gilgil b'idgotnena akatenindam, nokim da idenat



men ton kima yipand gilgil b'ogil inyomarena yingg teyenindam, si men re Godimna owabinti riga im, i dide kwa men re Keriso kima yipand gilgil owabinti riga im.

*Warim B'ogil Inyomarena*

<sup>18</sup> Mop nokip kon yimjatenyin da meraina b'idgotnena yu gowukoyind re ma ririr e yipa ririrkip omnenam warim b'ogil inyomarena kima rinsim ra meranim pita taukanj dem. <sup>19</sup> I komkesa God ma otobarki gowukoi gasap sam kima Godind yir yungaenenyi da Tina b'iga opima pita wa tapekiny. <sup>20</sup> Mop nokip opimemb God ma otobarki gowukoi gasap kea ril kesa rigaina negir mile map sake yokato Godim pilke, aji itemb re ma towainajog singi kena. Aji Godit singi yoramitonj towanim yimta undokam, onggit mana da warim b'ogil isma okasi dem. <sup>21</sup> Si onggit otobarki gowukoi gasap toda kwa opima b'ititrananj dem ringkaim re ton itkiki negir nya akatenenanj dide taukanj dem de b'ogil inyomarena kima b'itirapupu wa rokasim ra God ma b'iga tekeny dem. <sup>22</sup> Si men wumir im da komkesa God ma otobarki gowukoi gasa b'aenenanj dide kopa akatenenanj kongga mina b'ujena re dide ngirpu yu winind. <sup>23</sup> Aji ma Godimna onggityam otobarki gowukoi gasa nenapim, aji kwa meda yepim re yokatenenyu Yinayina Wingawingand rinte re Godimna naskajog wurar mera pilind. Si meda kwa meralenggyam meraina garind b'aena kima yir yungaukenenyu da men God ma okati b'iga taindam, i men b'itrarkindam meraina jiwim pilke. <sup>24</sup> Mop nokip men onggit warim b'ogil isma kena yirkokar

yokatonda, aji warim b'ogil isma rinte re rigap yir ongong ziyenyi re ma warim b'ogil isma e. Yete warim b'ogil isma yokateny onggit gasam pilind rinsim re ton yir ongong eyeniny? <sup>25</sup> Aji ra men warim b'ogil isma okasu nangga e re yir ongong kesa yibim, si men ket yir ungauka iyenyu ra musik wimena kima e.

<sup>26</sup> Odede yipa wip nya ke Yinayina Wingawingate kwa meraina danda kesa map yim nokaeneniny. Mop nokip men b'ogla yir topmitenindam aji men ma wumir im ridede e b'obogil yir opmitenam. Aji Yinayina Wingawingate Tilenggyam mera map gar bebig yokateny, si Ton ma ririr e yit opurenam onggit meraina gatabim. Aji Ton yir opmiteny Godim pilwa re gar bebig b'aena kima e. <sup>27</sup> I God yete re meraina gar yir eyeniny, Ton wumir e nangga nony menamena im re Yinayina Wingawingat amnikiny. Mop nokip Yinayina Wingawingat yina riga wa mim b'itena aramiteniny Godimna singi ririrind. <sup>28</sup> I men wumir im da komkesa gasap gilgil wiko amnikanj re towanim b'ogil mim yepim re Godind singi ziyenyi, i yena re God ara emokinonj Tina singind. <sup>29</sup> God naska nata Tina rigam get ke wumir awonj, i Ton kwa ket ten kea get ke naskand abagenjinonj yipa ririrkip Tina B'igamna kukip pila omnikam. Si idenat Ton naskajog b'iga tainy jogjog nanyingganwar wingirind. <sup>30</sup> I riga yena re God get ke naskand abagenjinonj, Ton kea ten ara emokinonj. I riga yena re God ara emokinonj, Ton kwa ket towa negir kesa dimdimjog riga nyi akainonj. I dide riga yama na re God negir kesa dimdimjog riga

nyi akainonj, Ton ket ten b'ogil inyomarena kima amnikinonj.

*Godimna Ipendi kesa Singi*

<sup>31</sup> Si onggit paemb da men nangga yit im nitinjindam onggityam gatab? Rada God re mera tab nate yibim, yete ririr e mera pilind geja omniam?

<sup>32</sup> God maike Tinajog B'iga ena yognatonj, aji Ton Tina B'iga nokainonj komkesa mera mana. Si ringma, yet re mera nokainonj Tina B'iga, ma awir e Ton kwa mera komkesa gasa jabajaba wurar ke notgoneniny?

<sup>33</sup> Yete ririr e God ma obagiki riga kot wa taramkiny? Makwa ririr e, nokip Godtembji Riga yete re towa negir kesa dindimjog riga nyi agoniny.

<sup>34</sup> I kwa yete ririr e towa pilind negir ma b'isagika omniam? Makwa ririr e, nokip Keriso Yesu kea uj awonj, aji ma ina nena na, ton kwa kea utnyitonj uj ke. I kwa Godimna yimjog yim tab ke juwai kima pipmet nate yibim, dide kwa b'itena yoramiteny meranim.

<sup>35</sup> Yete ririr e men wetaweta notininy Kerisomna singim pilke? Si ririr e bebig kima b'idgotnenat, o kopa kima b'angkindat, o rigam pilke bebig dide b'isadrena milet, o owoupat, o wi kesat, o moga kima negir gasat, o geja omniam girit?

<sup>36</sup> Ija emb ji yina peband iriki yibim da,

“Sin mor map uj mim nipouranj onggit kupka bibirind,

i sin pitapita nomnenanj da win re ija im opi re ongandam mamoi re dide.”

<sup>37</sup> Aji Keriso men singi niyeniny, si onggit Tina singi danda kaim men onggityam komkesa bebig mile wingirind kupkakupka gou wa amnenindam.

<sup>38</sup> Mop nokip kon kupkakupka iminjog ke wumir yokatenyın da ujıt ma rırır e, i yilot ma rırır e, i anerup ma rırır im, i ukoi wip iyoi rigap ma rırır im, i yunim milep ma rırır im, i warim milep ma rırır im, i danda kima gasap ma rırır im, <sup>39</sup> i gasa rinsim re wekeny gowukoi pumb wa ma rırır im, i gasa rinsim re wekeny gowukoi gou bora wa ma rırır im, i dide kwa nanggamog im re Godimna otobarki gasa, ton ma rırır im men wetaweta notinkanj Godimna singim pilke rınte re yibim mera Yonggyam Keriso Yesum pilind.

## 9

### *God ma Obagiki Riga Israel*

<sup>1</sup> I Kon iminjog yitkak nitindenyın rınte re Keri-som pilind yibim, i kon ma b'anyginenyın. Koina kukip ke nonykokıt yir ungatena eyeniny yipand gilgil Yinayına Wingawinga kima da, <sup>2</sup> “Kon ma sobijog gar bebig en dide koina garınd ita gar kopa b'aikındeneny.” <sup>3</sup> Mop nokip kon iminjog singi en da kon kolenggyam sake okasın dide Kerisom pilke tewaikisin ingkek ket rako kon yim takainyın koina nany dide yingganwar towanim yirkokar okatam yepim re koina kus ke gu riga. <sup>4</sup> Ton opimemb re Israel riga im. God ten abagenjinonj odede yit kima da, “Win re Koina okati b'iga im,” i Tina b'ogil inyomarena akainonj, i Tina outinti tirır omnijog yit akainonj, i Tina gog yit akainonj, i Tin ewangayam mile auyaeninonj, i ket Tina tirır omni yit agoninonj. <sup>5</sup> I kwa dadwar yena re otomapu ke God abagikinonj yirkokar okawam re towa mim. I kwa Keriso

re Israel riga waina kus kena ukendonj, i Ton re God e dide komkesa gasa re Ti wira nasim wekeny. Si esourena yebim ngirpu kesa Ti pilwa, iminjog!

<sup>6</sup> Riga ma ririr e odede indeny da God ma onggityam yitkak makwa ririrkip awonj. Mop nokip riga yepim re Israel kus ke ukukto, si ma ton komkesa iminjog Israel riga im. <sup>7</sup> I kwa Abraamimna kus ke b'igawar re ma ton komkesa tina b'iga im, aji God Abraamind yomnonj da, "Isakim pilke b'usmureni b'iga nena im moina kus ke b'iga nyi tagenaeranj dem." <sup>8</sup> Odede ma yindeny da opi re Abraamimna kus ke b'igawar re ma komkesa God ma b'iga im, aji insim iminjog Abraamimna b'iga yena re God tirir omni yit kima abagenjinonj da, "Ton re Abraamimna b'iga im." <sup>9</sup> Mop nokip God kea tirir omni yitkak ke Abraamind yomnonj da, 'Yipa kemag kak ke odede win nate kon kwa titenjin dem, i Saram ita dem b'iga' <sup>10</sup> Ma onggityam nena na. Aji re kwa Ribeka yipa mera b'u Isak kima pil b'asopayonda <sup>11</sup> i re maka damdam b'iga ukendonda dide maka yipa b'ogil o negir mile amnikinonda, aji God kea Yakobind yobagen-donj. Nokim da idenat Godimna obagenda ril ibneneny ra ma rigaina omniki wiko kae aji Tina ara emokam pilkae. <sup>12</sup> Si God ma ril ma rigaina mile omnika kaim, aji Godim pilkaim yete re tina riga ara emoka eyeniny. Si Ribekand womnonj da, "Nanyamyamte yinganyamimna wiko riga tainy dem." <sup>13</sup> Si ija emb ji iriki yibim da, "Kon Yakobind singi yiyenenond, aji kon Esaund singi kesa na yommenond."

14 Si nangga im men nitinjindam? Ringma, ita Godim pilind negir kima kaokao mile yibim? Makwa ita! 15 Mop nokip Ton Mosem pilwa yindenya da, “Kon ita kear tin omnenyın yena ra Kon singi omnyın kear omnenam, i kwa Kon ita gar ke kear tin omnenyın yena ra Kon singi omnyın gar ke kear omnenam.” 16 Si onggit paemb da itemb God ma ara b'emoka re ma rigaina singi kae, i ma rigaina b'asowa wiko kae, aji Tina kear kae. 17 Mop nokip yina pebat Ejipt kantri mopyam king Paraom gatab yisipkis da, “Kon onggit mop pena mor pipmet mokawond, nokim da idenat kon koina danda pita omnenyın moina mile omnika wingirind dide idenat kwa Koina nyi pitand auka ikeny dem komkesa gowukoyind.” 18 Si onggit paemb God kear e tin omneny yena ra Ton singi kear omnenam, i Ton gar rogilkak e tin omnık yena ra Ton singi gar rogilkak omnıkam.

### *Godimna Negir ma B'isagika dide Kear*

19 Si yipat yama b'ogil e kor pilwa odede b'arkita oramis da, “Ra God rigaina gar rogilkak tamnikiny, si nangga pae Ton kwa b'injawa yoramiteny? Nokip ra Ton Tina singi oramis, si makwa ita yete ririr tainy Tina singi ogokam.” 20 Aji yetet man ji riga yete re Godim yit yengaurenainyit? Ita yipa riga ma omniki gasat indeny tina omnika rigam pilwa da, “Nangga pena man odede nomnikot?” 21 Ringma, pam ke gasa omnika rigam ita ti pilind seo yibim it re yipaina pam kipol ke omnıkam b'ogil isnawa gasa o minda omnıkam isnawa kesa gasa? 22 I God nında riga amnikinonj re ukoi soro kima b'isagika okatena mana dide ket

negir omnika mana. I rada God, Ton ukoi-jog musik wimena ikeny towa pilwa, nokim da idenat Ton Tina ukoi soro kima b'isagika pita wa ominy towaina negir mile gatab dide Tina danda tauyainy, si nangga e man mitinjit? <sup>23</sup> I Ton kwa ninda riga amnikinonj kear omnenam dide b'ogil inyomarena okawam. I rada Ton kwa Tina ukoi-jog b'ogil inyomarena ouyaenam singi tainy towa pilwa, si nangga e man mitinjit? <sup>24</sup> Si yepim ji opimemb riga yena re God ara emokinonj kear omnenam dide b'ogil inyomarena okawam? Si opimemb ji men riga, ma Ju riga nena na, aji toda kwa Tina obagiki kesa riga. <sup>25</sup> Si God ija emb yindeney bageyam Oseamna peband da,

“Kon opima ara temokinyin dem Koina riga yepim re Koina obagiki kesa riga,

i dide opima Kon Koina singi iyenijog rigam nyi tagenainy in dem yepim re Koina singi iyeni kesa riga.”

<sup>26</sup> “I dide onggit pipmetind God yindenonj onggit riga wa pilwa da ‘Win re ma Koina obagiki riga im,’

aji onggit yipaina pipmetind yirkokar God opima ten nyi tagenainy dem da, ‘Win re Koina b'iga im.’ ”

<sup>27</sup> Isaya toda kwa Israel gatab b'okta unena kima pita amneniny da, “Nangga ma ji rada Israel riga ogenka kesa im odede opi re sipand jimiya re dide, aji God ma irari ninda komb riga nenapim dadal yirkokar okasi dem. <sup>28</sup> Yonggyam onggit gowukoyind Tina tirir omni yitkak kaim kup-kakupka negir mile riga isagika teyeniny dem, aji b'isagika win kut e ominy dem. Si onggit paemb

ma jog riga im irarki tekeny dem.” <sup>29</sup> I kwa Isaya kea naska nata yindenonj odede yipa wip yitkak da,

“Rako Yonggyam, Dandam Rigib Riga God maka meranim ninda Abraamimna b'igawar erarinonj,  
 si men keako aukitondam odede yipa wip Sodom re dide,  
 i kwa men keako aukitondam odede yipa wip Gomora re dide.”

### *Nangga pena Israel Rigap maka Yesu Kerisond Yokato?*

<sup>30</sup> Si men nangga yit im nitinjindam? Re God ma obagiki kesa riga yepiya re maka negir kesa dimdimjog riga nyi oraka yiyeno, ton kea negir kesa dimdimjog riga nyi yokato. Si itemb negir kesa dimdimjog riga nyi re gar ke utkunda ke okati e. <sup>31</sup> Aji Israel riga yepiya re gog yit ke negir kesa dimdimjog riga nyi oraka yiyeno okatam, ton maike God ma gog yitim pilke negir kesa dimdimjog riga nyi yokato. <sup>32</sup> Si nangga pena ton maka yokato? Mop nokip ton oraka yiyeno re ma gar ke utkunda kena, aji b'ogil mile omnika kena. Towanim yipa b'uwombenapu motir re Yesu Kerisote. Si ton kea osmurkito onggit b'uwombenapu motirim pilind. <sup>33</sup> I Isaya onggit b'uwombenapu motir gatab yirikonj odede da,

“Yir de, Kon ita oramisin dem yipa b'uwombenapu motir dide sap otendenapu kila Siyonind.  
 I yet ra Ti pilind gar ke utkunda oramis, God ma ita tin ingarim ominy dem.”



# 10

## *Israel Riga Bond B'ipto God ma Negir kesa Dimdimjog Riga Nyi*

<sup>1</sup> Kor nany dide yingganwar! Koina garind b'ogil singi dide Godim pilwa seo kima yir opmita re Israel riga towanim yirkokar okata ma.

<sup>2</sup> Mop nokip kon b'ogil e towa gatab yir ungata yit tapureninyin da Israel rigap Godind danda kima e singi yiyenenyi, aji ton ma ita iminjog nya yimta yundokenenyi rinte re God yindeny da riga yirkokar okatam re gar ke utkunda kae.

<sup>3</sup> Nokip ton ma wumir na da negir kesa dimdimjog riga nyi re Godim pilkae. I ton towainajog nya kena oraka yiyeno negir kesa dimdimjog riga nyi kima onyitam. Si ton maka yimta undoka yiyeno negir kesa dimdimjog riga nyi rinte re God akaeniny towa pilwa yepim re Kerisond gar ke utkunda ke yokatenyi. <sup>4</sup> Mop nokip Keriso kea gog yit ririrkip yomnonj komkesa gar ke utkunda riga wa negir kesa dimdimjog riga nyi okawam.

<sup>5</sup> Si Mose yirikonj negir kesa dimdimjog riga nyi gatab rinte re God akaeniny towa pilwa yepim re gog yit yimta undokenenanj. Si ija emb ji yindeny da, "Riga yet ra tamnikiny onggityam gasa rinte re gog yitit engaeniny omnikam, ton wimena ikeny dem onggit gog yitim pilnate."

<sup>6</sup> Aji negir kesa dimdimjog riga nyi rinte re gar ke utkunda ke ik, ton ija emb ji yindeny da, "Goro moina garind mitindim da, 'Yete yik dem de pumb tungg wa?' " Itemb re Kerisond gou wa inkam yit e. <sup>7</sup> O da, "Yete yik dem de gowukoi wira wa rokasim re uj riga wekeny?" Itemb re Kerisond uj ke opendam

e gowukoi wira ke. <sup>8</sup> Nangga e ton yindeny? Ton ija emb ji yinj da, “Yirkokar yitkak re kea mor wus nate ainy opurenam de moina tugim wa dide nony menamena omnikam de moina gar wa.” Itemb re gar ke utkunda ke okatam yirkokar yitkak e rintere men pitapita omnena yiyenyu. <sup>9</sup> Ra man moina tugim ke riga wa wipind pitapita omnyit da “Yesu re kor Yonggyam e,” dide man moina garind gar ke utkunda ke okasit da “Godit Tin yutnyitonj uj ke,” si man ita yirkokar okasit. <sup>10</sup> Mop nokip yet ra gar ke utkunda okas tina garind, si ton kemb negir kesa dimdimjog riga nyi yokas, i dide yet ra tina gar ke utkunda gatab riga wa wipind pitapita ominy tina tugim ke, si ton kemb yirkokar yokas. <sup>11</sup> Mop nokip yina pebat yindeny da, “Yet ra Ti pilind gar ke utkunda oramis, God ma ita tin ingarim ominy dem.” <sup>12</sup> Mop nokip God makwa ita bu b'iyena mile yomnikeneny Ju riga dide God ma obagiki kesa riga wa ganggand. Nokip Ton re komkesa riga wa Yonggyam e yete re ukoi jog wurar agoneneniny komkesa riga wa yepim re Tin nyi yogenaneny. <sup>13</sup> Mop nokip bageyam Yoel ija naemb ji yindonj da, “God opima komkesa riga wa yirkokar takainy dem yepim re Yonggyamimna nyi yogenai.”

<sup>14</sup> Si ridede e rigap Yonggyamind nyi yogenai, rako ton maka Tin gar ke utkunda ke yokato? I ridede e ton gar ke utkunda ke yokasi, rako ton maka utkundo? I ridede e ton utkundenyi, rako maka yipa rigat pitapita yommenonj towa pilwa? <sup>15</sup> I dide kwa ridede e ton pitapita yommenyi riga wa pilwa, rako Yonggyam maka ten etmikisinonj? Si yina peband ija emb ji iriki yibim da, “Otomanti-jog piskak im towaina yepim re God ma b'ogil bage

yit pitapita yommenenyi!”

*Israel Riga Bond B'ipto God ma B'ogil Yirkokar Bage Yit*

<sup>16</sup> Aji komkesa Israel rigap maka God ma itemb b'ogil yirkokar bage yit yimta yundoko, mop nokip Isaya yindeny da, “Yonggyam! Ke yet sowaina bage yit gar ke utkunda ke yokatonj?” <sup>17</sup> Si onggit paemb gar ke utkunda ik re bage yit utkunda kae, aji itemb bage yit re Kerisomna yirkokar yitkak kae. <sup>18</sup> Aji kon nitinjin. Rika iminjog Israel rigap maka utkundo? Nayi, ton kea iminjog utkundo. Si yina pebat ija emb ji bageyam waina opureni yirkokar yitkak gatab yindeny da,

“Towaina ara kea komkesa gowukoi wa wuwenonj,  
dide towaina yirkokar yitkak kea komkesa gowukoi ngirpu wa wuwenonj.”

<sup>19</sup> Aji kon kwa nitinjin da, “Iminjog Israel rigap maka wumir aukito?” Mose naska kana yindeny da,

“Kon opima b'enga yitam riga b'ogil tamnikinyin dem yena re Kon maka abagikinond Koina rigam.

Si ra win Ju yitam rigap opimemb b'enga yitam riga yir tangindam dem, win opima nonyik teponenindam dem.

Si ra win opimemb korirkorir b'enga yitam riga yir tangindam dem, win opima soro taindam dem towa pilwa.”

<sup>20</sup> Dide Isaya kwa moga kesa God ma opureni yitkak pita yomnonj da,

“Ken tonpiya nodaro yepiya re maka oraka niyeno.

Kon Kolenggyam towa pilwa pitapita aenond yepiya re Ken maka nerkeno.”

<sup>21</sup> Aji kwa ton Israel riga amniny da,

“Onggit kupka bibir wingirind, Kon Koina yim b'itnikenenyin Koina riga ingaukam Kor pilwa yepim re Kornim utkunda kesa riga dide negir yit opurena riga.”

## 11

*God Wurar Akainonj Israelimna Irari Komb Riga wa*

<sup>1</sup> Si onggit paemb kon nitinjin. Rika iminjog God kea Tina riga ewaikurinonj? Nayi maka. Mop nokip koda re yipa Israel riga en, i Abraamimna kus ke b'iga en, dide Benyamin gu ke riga en. <sup>2</sup> God maka ewaikurinonj Tina riga ya pilwa na re Ton naskand wumir awonj. Ma win wumir im nangga e yina pebat yindeney Eliyam gatab? Si ton ija naemb ji Godim pilind b'injawa yit yoramitenonj Israel riga wa gatab <sup>3</sup> da, “Yonggyam! Ton ke Moina bageyam uj tama na epouto, i ton kwa Moina yina si omnikapu kap eporkito, i ken nena na komb niraro. Aji ton koina yirkokar e oraka yiyenyi ongandam.” <sup>4</sup> Si nangga mira yit na God tin yomnonj? Si ija naemb ji yomnonj da, “Kon Kornim erarinond re seben tausin (7,000) riga na yepiya re maka kumsos b'amkito Baalim pilwa.” <sup>5</sup> Si onggit paemb ji yu kwa odede nya ke ninda irarki Ju riga wekeny yena re God abagenjinonj Tina wurar ke. <sup>6</sup> Aji rada wurar kae, si

itemb re ma b'ogil mile omnika kae. Mop nokip rada b'ogil mile omnika kae, si itemb wurar re ma ita wurarim tainy. <sup>7</sup> Si nangga e ket? Si ma komkesa Israel rigapiya yokato onggityam gasa rina re ton oraka yiyeno. Aji Godimna obagiki riga nenapiya yokato yena re Ton ten erarinonj towa wingirind. I riga yena re God maka abagenjinonj towa wingirind, ton re gar ke rogilkak na aukito.

<sup>8</sup> I yina peband ija emb ji iriki yibim da,

“God towa akainonj nony kesa wingawinga,  
     i yirkip rinsim re ma ririr im yir ongongim,  
     i dide yipya rinsim re ma ririr im utkundam  
 ngirpu yu.”

<sup>9</sup> I dide kwa Dawid yindenya da,

“Toko towaina owou kasa raukinem disim, i girimim,  
     i negir b'uwombenapum, i dide negir mira okatam.

<sup>10</sup> I towaina yirkip sibibim raukinem, nokim da idenat ton maka yir ongong teyenanj,  
     i towaina mudakak dadal uwinjauwinj raukinem towaina bebig map.”

### *God ma Obagiki kesa Riga wa Yirkokar Akaeniny*

<sup>11</sup> Si onggit paemb kon nitinjin. Rika iminjog Israel rigap kea b'atoukena wuwenonj, ngirpu sap otekto? Nayi ma ija e. Aji towaina negir sap otenda kae yirkokar okatam mile yikeny God ma obagiki kesa riga wa pilwa. Si idenatemb ket Israel rigap ten nonyik iponena teyenenanj.

<sup>12</sup> Aji Israel rigap kea sap otekto negir mile wa, i ingkenaemb gowukoi riga wa pilwa ukoi jog b'ogil

gasa teyinonj, dide onggit towaina gou wa isendat God ma obagiki kesa riga wa tetiyainonj re ukoijog b'ogil gasa na. Si ridede ukoijog kip e tawik dem towanim opi re komkesa God ma obagiki Israel riga ra ton gar ke utkunda oramisi Kerisom pilind?

<sup>13</sup> Si kon God ma obagiki kesa riga wa pilwa nitingin. Kon re God ma obagiki kesa riga, wanim itmikitijog riga en. Si kon onggityam koina itmikitijog riga ma wiko e yesourenenyin. <sup>14</sup> Mop nokip kon ukoi singi en da idenat kon ninda nya ke koina kus ke Israel riga nonyik b'iponenam tanneninyin dem dide towa wingirind ninda riga wa yirkokar tagoninyin dem God ma yit ke. <sup>15</sup> I God kea Israel riga esainonj i ingkenaemb Ton ket gowukoi riga kima rigariga awonj. Si ra Ton ten b'usaya takasiny, nangga e ket tawik? Itemb re ujim pilke yirkokar e. Si onggit paemb kon ukoi singi en da ninda Israel rigap b'ogla yirkokar okatenyi dem. <sup>16</sup> Ra man naskajog sobijog kipol ipkenjit moina kupka kipol ke dide Godim pilwa yina mile omniket, si itemb kupka kipol re kwa yina e. Dide kwa ra ap yina ibim, si komkesa bia kwa yina im.

<sup>17</sup> Si ra rigat b'uwa ke olib nanggim pilke bia ipenj nanggim, i yii dide itlis b'aingintam de b'ogil olib nanggimna ipendipu kumbind, si onggityam itliti biamna yilo wimena re onggit b'ogil olib nanggimna ap ke okati ngao kae. Si God ma obagiki kesa riga, mada odede yipa wip riga et b'uwa ke olib nangg re dide, aji daka Israel riga re b'ogil olib nangg e. <sup>18</sup> Si man goro b'atisourenim onggit b'ogil olib nanggimna ipki bia wa pilind. Rada man ita b'atisourenyit, si

ma mansim onggityam ap awaminyit, aji onggit apsim men mowami. <sup>19</sup> Si ket ija emb ji man mitinjit da, “Bia epkinonj re nok mana da idenat ken nititlis b'aikintam ipendipu kumbind.” <sup>20</sup> Si iminjog e. Ten epkinonj re towaina gar ke utkunda kesa mapena, aji man onyitot re gar ke utkunda kena. Si onggit paemb da man goro nony mena-mena ke pumb wa tainim, aji moga na tainyit. <sup>21</sup> Mop nokip rada God get ke bia maka ena agnasiononj ipkam, meda kwa makwa ita ena motignas dem. <sup>22</sup> Si onggit paemb ji da man yir de, God re kear riga e dide kwa Ton re iminjog danda kima negir ma b'isagika omnika riga e. God iminjog danda kima negir ma b'isagika yiyenonj towa pilwa yepiya re Israel riga sap otendento, aji Ton ita men God ma obagiki kesa riga kear momneny. Si ra man onggityam Tina kear kima wimena metkenyit, mor omanda ji Tina kear man kima. Aji ra maka ra, man Godim pilke ipendi e mitibnyit. <sup>23</sup> I kwa ra Israel riga maka ra tekeny gar ke utkunda kesand, si God kwa opima ten b'aikintam ipendipu kumbind tetlisiny dem, mop nokip Godim ita danda ten b'usaya b'aikintam ipendipu kumbind itlitam. <sup>24</sup> God ma obagiki kesa riga! Man re get ke b'uwa ke olib nangg et. I God men mependonj onggityam get ke b'uwa ke olib nangg kena dide b'ogil olib nanggind b'aikintam ipendipu kumbind mitlitonj, si onggityam itliti re bebig kima na, nokip itemb re ma God ma get ke oramiti nya kae. Aji Israel riga re God ma get ke oramiti bia im onggit b'ogil olib nanggind. Si ra Ton ten towainajog olib nanggind b'aikintam ipendipu kumbind itot teyeniny, si onggityam itliti

re iminjog wewajog e tainy Tinim.

*Komkesa Israel Rigap ita Yirkokar Okasi dem*

<sup>25</sup> Gar ke utkunda nany dide yingganwar! Kon ukoi singi en da win wumir takatenindam onggityam God ma wigawiga isamki gasa, mop nokip win idenat maka walenggyam b'atisourenindam da, "Sin multekip kima riga im." Si itemb ji wigawiga yit da ninda Israel riga ija ima gar rogilkak auki wekeneny, ngirpu God ma obagiki kesa riga wingirind komkesa Tina obagiki riga Ti pilwa tuweny dem. <sup>26</sup> I komkesa Israel rigap ita yirkokar okasi dem. Nokip ija emb ji yina peband iriki yibim da,

"Yirkokar Okawa Riga Israel rigaina mopjog tungg  
Siyon kae ik dem,

i Ton Godind ewangaya kesa mile tewaiku-  
rainy dem Yakobimna b'iga wa pilke.

<sup>27</sup> Ra Kon towaina negir mile awir tamnainyin,  
si itemb re Koina outinti tirir omnijog yit e  
towanim okatam."

<sup>28</sup> Ra God ma b'ogil yirkokar bage yitim pilke tage-  
naindam, Israel riga re God ma geja riga im, mop  
nokip God wen singi im eyeniny b'ogil onnam  
yepim re win Tina obagiki kesa riga. Aji kwa  
God kea Israel riga abagenjinonj, si ra ten onggit  
God ma obagendi mile ke tagenaindam, ton re  
God ma singi iyeni riga im. Mop nokip God Tina  
outinti tirir omni mal yit akainonj re towa b'uwar  
wa pilwa na. <sup>29</sup> Mop nokip God ma ita nony  
b'engendeneny Tina wurar ke obagenda dide ara  
emoka gatab. <sup>30</sup> Mop nokip win re naskand Godim  
pilwa gar ke utkunda kesa na wekenot, aji yu



win kear okati im wekenyit odede yipaina gar ke utkunda nya ke. Nokip Israel riga wekeny re towaina gar ke utkunda kesa nasim. <sup>31</sup> Si odede yipa wip nya kaim yu Israel rigap gar ke utkunda kesa wekeny waina kear okati map, nokim da idenat toda kwa yu kear okatenyi. <sup>32</sup> Mop nokip God komkesa kea riga gar ke utkunda kesa kara bora wa aramkinonj i ket sibibmet riga amninonj, nokim da idenat ama rika Ton komkesa riga kear tanneniny.

<sup>33</sup> Si Godimna multekip dide Tina wumir re ogenka kesa ngortodjog wa im! Tina b'isagika re odara kesa im, dide Tina nya re nony auka kesa im! <sup>34</sup> Si ija emb ji yina peband yindeney da, "Ke yet wumir awonj Yonggyamimna nony mena-mena?"

O ke yet Tinim b'ugowa riga awonj?"

<sup>35</sup> "O ke yet Yonggyamim naskand nanggamog na yokawonj

dide Ton ti mira itendau dem?"

<sup>36</sup> Mop nokip komkesa gasa re Yonggyamim pilke na b'atobarkito, i Yonggyamimna yir ipka nasim wekeny, i dide Yonggyam mim yibnainy. B'ogil inyomarena Ti pilwa dadal ngirpu kesa, iminjog!

## 12

### *Gar ke Utkunda Rigaina Godind Ewangaya Mile*

<sup>1</sup> Gar ke utkunda nany dide yingganwar! Si onggit paemb kon wen tugoinyin ra Godimna kear kae da win waina ji Godim yokaina Tina sam kima singi yilo wimenam yina si gasa omnikam. Itemb re waina wingawinga ke kumsos b'amka e. <sup>2</sup> Dide goro win onggityam gowukoi mile kupkakupka

iminjog ke wumir taukinam, aji win waina nony menamena sisil amnikinam, i ingkaimemb win ket b'enga wip riga taindam. Nokim da idenat win ket temjatenindam nangga im re Godimna b'ogil dide sam okatam mile i dide kupkakupka singi.

<sup>3</sup> Si God kea kor wurar nokawonj i kon Godimna onggit wurar kae nitinjin wa wingirind yipayipa rigam pilind. Goro win nony menamena ukoi-jog tamnikinam ninda gasa wa pilwa rina re God maka wa akainonj wanim nony menamena omnika. Aji win b'ogla b'ogil nony menamena omnika eyeninam onggit gasa wa pilind rinsim re God tondon agen kainy waina yipayipa gar ke utkunda ririrind. <sup>4</sup> Si mera opima jogjog kipear yipaina jiwind, aji onggit kipear yipayipa wa towa omnika re ma yipa ririr im. <sup>5</sup> Si odede yipa wip nya ke meda jogjog riga wekenyin yipaina jiwind, it re Kerisom pilind. Si men re yipayipa kipear im, i yipayipa kipear re komkesa kipear wa pilind gilgil im b'inaukeni wekeny onggityam yipaina jiwind. <sup>6</sup> I mera opima wekeny God ma okai yiyag wurar gasa rina re God nogoninonj b'engabenga wip Tina wurar ke. Rada yipa rigat God ma okai bage yit iyenam yiyag wurar e okas, si ton b'ogla yamnik tina gar ke utkunda ririrind. <sup>7</sup> I rada God ma okai yim b'akaenam yiyag wurar e okas, si ton b'ogla yamnik b'ogil yim b'akaena ke. I rada God ma okai ouyaenam yiyag wurar e yokas, si ton b'ogla riga rauyaenin b'ogil ouyaena ke. <sup>8</sup> I dide rada God ma okai b'ugowam yiyag wurar e okas, si ton b'ogla rugoin b'ogil b'ugowa yit ke. Rada yingg iyenam, b'ogla yamnik ukoi kear b'amnena kima. Rada wip iyoyim, b'ogla yamnik danda kima

dinder kesa. Dide rada kear omnenam, b'ogla yamnik ukoi sam kima.

*Gar ke Utkunda Rigaina Singi Iyena Nya*

<sup>9</sup> I singi b'iyena mile b'ogla yebim b'anyginena kesa. I men b'ogla negir yir ke yir ongong reyeninum nanggamog gasa im re negir kima. Dide men b'ogla danda kima ramorkeninum nanggamog im re b'ogil gasa. <sup>10</sup> I win re gar ke utkunda ke nany dide yingganwarjog im. Si win b'ogla walenggyam walenggyam singi b'itiyenindam wa nanywarjog pila, o wa yingganwarjog pila. I walenggyam walenggyam b'ogla pita tamnenindam iminjog isnawa mile. <sup>11</sup> I Yonggyamimna wiko omnikand, win goro dinder taininam, aji b'ogla danda kima singind Tina wiko omnika teyenindam dide b'ogla wingawinga ke kupka danda ondratena teyenindam. <sup>12</sup> I win b'ogla ukoi sam taukindam warim b'ogil isma okatam. I win b'ogla musik wimena tuwenyit bebig kima b'idgotnena wingirind. I dide win b'ogla iminjog nony kima tainindam waina yir opmita wingirind. <sup>13</sup> I win b'ogla yina riga wa pilind ingaena gasa yingg teyenindam. I dide b'ogla obayam oraka teyenindam b'obogil obai omnenam. <sup>14</sup> I win b'ogla b'ogil omnena teyenindam yepim re bebig dide b'isadrena mile amnikenenanj wa pilind. I kwa ten b'ogil omnika nena teyenindam, aji goro ten sake omnika teyenindam! <sup>15</sup> I win b'ogla ukoi sam kima ngolengole aena tuwenyit ton kima yepim re sam kima ngolengole aena wuweny, i yii tainindam ton kima yepim re yii aenenanj. <sup>16</sup> I win

b'ogla walenggyam walenggyam yipaina gasand nony menamena tamnikenindam. I goro nony menamena tamnikenina rigaina isnai pipmet okatam, aji walenggyam gou wa tainindam goujog wa pipmet okatam. I goro walenggyam walenggyam b'atgenaina da, “Kon re b'ogiljog multekip kima riga en”! <sup>17</sup> Ra yipa rigat wa negirjog mile tamnikau, goro kwa widaka negir mile ke mira itendawa! Aji b'ogil mile omniam nony kima tekenyit komkesa riga wa wipind. <sup>18</sup> Ra ririr ra, win b'ogla waina gatab ke ngimbla iyanya komkesa riga wa pilwa. <sup>19</sup> Kor rigawar yena re kon singi eyeninyin! Goro win walenggyam mira tamneninam waina geja riga, aji win b'ogla gangga okaena teyenindam God ma ukoi soro kima b'isagikam pilind. Mop nokip yina peband ija emb ji iriki yibim da, “Yonggyam yindeny da geja riga wa mira omnena wiko re Koina e, si Konten mira tamneninyin.” <sup>20</sup> Aji rada moina geja riga owoupa nate yibim, man b'ogla tin owou ke ongenket. I rada ton nyipa nate yibim, man b'ogla ti onaya nyi okaet. Si ingkaimemb man wul wewir angurkainyit tina mopind, si ton ket ingar dide gar kopa im takateniny. <sup>21</sup> Si goro negirjog milet men gou wa mamn, aji man b'ogla b'ogil mile ke negirjog mile gou wa tamneninyit.

## 13

### *Mopyam Riga Yimta Undokam*

<sup>1</sup> Komkesa riga, win b'ogla waina pumbjog nyi riga yimta undokinam, mop nokip rako maka God danda aramkiny, keako maka yipa danda

yibim. Si komkesa b'engabenga wip danda rinsim re wekeny re God ma oramki

im. <sup>2</sup> Si onggit paemb yet ra onggityam danda okai rigam pilind geja riga tainy, ton kemb gejam onyis Godimna oramiti b'ingawam pilind. Si onggit gejam onyiti rigap towalenggyam negir ma b'isagika takatenanj dem. <sup>3</sup> Mop nokip wip iyoi rigap ma opima ten mogam tamnenanj yepim re b'ogil mile amnikanj, aji towa pilwa im yepim re negirjog mile amnikanj. Si ringma, ma man singi et danda okai riga moga uwadam? I man b'ogla tamnikinyit b'ogil mile, si idenat man esourena okasit ti pilke. <sup>4</sup> Mop nokip ton re Godimna wiko riga e yibim mornim b'ogilim. Aji ra man negirjog mile omniket, man b'ogla moga taet. Mop nokip ton ma jaba mop pae yowam or tabtab geja giri. Si itemb re negirjog mile omnika rigand negirjog bebigind oramitam danda e. Si ton re Godimna wiko riga e yete re ukoi soro kima negir ma b'isagika mira yoramiteny towa pilwa yepim re negirjog mile amnikanj. <sup>5</sup> Si onggit paemb man b'ogla iminjog yimta tundokinyit, ma odede nena ma da ita ukoi soro kima negir ma b'isagika tawik dem, aji kwa odede ma da moina kukip ke nonyokit wumir motiny da goro omnikim. <sup>6</sup> Si nok paemb ji win kwa towa pilwa teks oramka eyenenindam, nokip ton re Godimna juwai okai gabmani wiko riga im yepim re b'asowa wuweny onggityam gabmani wiko omnikam. <sup>7</sup> Si win agoninam komkesa riga wa nanggamog im re wen gabmani gogit engaeniny ogonam. Si win b'engabenga wip teks ogona eyeninam towa pilwa yepim re b'ingawa yoramitenyi towanim ogonam.

Ɔ win moga aininam towa pilwa yepim re wen mogam amnenanj towaina okai danda nyi ke! Ɔ dide win isnawa eyeninam yepim re ukoi nyi riga wekeny!

*Gar ke Utkunda Rigaina B'ogil Wimena Mile Riga wa Gangand*

<sup>8</sup> Ɔ win b'ogla tundwatenindam mira b'agona mile wa wingirind, aji win b'ogla bebig urowa-tenya walenggyam walenggyam singi b'iyena mile omnikam. Mop nokip yet ra ti rigand singi iyeny, ton kea komkesa gog yit ririrkip amniny. <sup>9</sup> God ma b'ingawa yit opimemb ji da, “Goro gigir dide yigyig b'iyena mile omnika! Goro riga on-gandim! Goro yurowam! Ɔ goro yipa riga ma gasa singi iyenim!” Ɔ dide kwa nanggamog im re ninda b'ingawa yit wekeny. Si onggityam komkesa God ma b'ingawa yit wekeny re onggityam b'ingawa yit nasim da, “Singi yiyene mor rigand mada re dide!” <sup>10</sup> Ɔ singi b'iyenat ma opima ti rigam negirjog mile omnikainy. Si onggit paemb da singi b'iyena mile re gog yit ririrkip omnika mile e.

<sup>11</sup> Ɔ win b'ogla odede singi b'iyenina, mop nokip win wumir im ji yunim win. Ɔ win itemb ke ik wanim utnikam yutungapu ke. Mop nokip re men naskand Kerisond gar ke utkunda ke yoka-tonda, si meraina yirkokar okatam re ma wus nat yibnonj, aji yunim onggityam yirkokar okatam re kea wusjog nate ainy. <sup>12</sup> Ɔ siwiny yik re momta ispara wa e, aji kea daka bibir wus nate ainy. Si onggit paemb men b'ogla tatogikindam sibibimna wiko, aji men b'ogla b'itkokindam ngayamna nim iteorena geja kobirgim. <sup>13</sup> Si men ket b'ogla

nony kima na b'engainum odede it re bibirind wimena re dide, i goro isanikesa b'isingkena tuwenim dide goro ikpip wimena tuwenyit, i goro yurowamyurowam b'arauka mile dide negir b'iyena singi milend wimena tuwenyit, i dide goro b'ipowa dide negir yir ke yir b'angong milend wimena tuwenyit. <sup>14</sup> Aji win b'ogla Yonggyam Yesu Kerisond ikisya waina garind, i goro naska gowukoi rigaina gim ke gasa gatab nony mena-mena tamnikinam get ke rigaina gim ke singi mile ririrkip omniam.

## 14

### *Goro Gar ke Utkunda Riga wa Wingirind B'isagika*

<sup>1</sup> Win b'ogla sam ke okasya riga yete re danda kesa yibim gar ke utkundand, i goro yit b'ugwatena kima b'isagikam taininam onggityam gatab rinsim re tina nonysipsip wekeny. <sup>2</sup> I riga yete re ririrkip gar ke utkunda yokas, ton komkesa owou dide ongong gasa engaeniny re owou mim, aji riga yete re danda kesa gar ke utkundand yibim, ton owoujog nena im awiny. <sup>3</sup> Si yet ra komkesa gasa tengaeniny owowim, si ton goro nony ke yerinen tin yete re owoujog nena awiny. Aji kwa yet ra owoujog nena tawiny, si ton goro b'isagika yeyen tin yete re komkesa gasa engainy owowim. Mop nokip God kea tin sam ke yokatonj. <sup>4</sup> Yetet ji man riga yet ra yipa riga ma wiko rigand b'isagikam omnyit? Tina utnyita dide egomenda re ti Yonggyamim pilnate. Si Yonggyamte tin utnyis, mop nokip Yonggyamim

ita Ti danda tin utnyitam. <sup>5</sup> I kwa ra yipa rigat yipa bibir nena ukoi jog yinam omnenny ninda bibir wa pilke, aji ra yipa rigat daka komkesa bibir yipa ririr tamneniny, si ton tilenggyam b'ogla kupkakupka iminjog ke yakat tinim b'ogilim. <sup>6</sup> Yet ra ton yipa bibir nenam nony menamena omnikeneny, ton nony menamena yomnikeneny re Yonggyamind esourena ma. I yet ra ton komkesa owou dide ongong gasa tengaeniny owowim, si ton komkesa owou dide ongong gasa engaeniny re Yonggyamind esourena ma, nokip ton God naemb siteket yit yomneneny. I dide yet ra ton owoujog nena tawiny, ton owoujog nena awiny re Yonggyamind esourena ma, i ton kwa God naemb siteket yit yomneneny. <sup>7</sup> Mop nokip mera wingirind makwa ita yipa riga yilo yibim tinim nenam, i dide makwa ita yipa rigat uj okas tinim nenam. <sup>8</sup> Ra men yilo tekenyin, si men yilo wekenyin re Yonggyam mim. I ra men uj taindam, si men uj aindam re Yonggyam mim. Si onggit paemb ji da nangga ma ji men yilo im wekenyin o uj im wekenyin, men re Yonggyam mim. <sup>9</sup> Mop nokip onggit ril penaemb Keriso uj yokatonj dide yilo yokatonj, nokim da idenat Ton Yonggyam tau dem yilo rigam dide uj rigam. <sup>10</sup> I men komkesa opima Godimna b'isagikapu wipind towinkindam dem. Si man nangga pae b'isagika omniket moina gar ke utkunda nanyim o yingganim pilind? O dide kwa man nangga pae nony ke yirinenenyit moina gar ke utkunda nanyind o yingganind? <sup>11</sup> Mop nokip yina peband ija emb iriki yibim da, “Yonggyam ton yindeney da, ‘Kon yilo e nibnenenyin, si komkesa riga kor pilwa



opima kumsos b'atimkanj dem,  
 i dide komkesa weyatip opima Godim pilwa  
 pitapita tamnenanj dem towaina omniki  
 negir mile.' ”

<sup>12</sup> Si onggit paemb mera wingirind yipayipa rigap  
 opima Godim pilwa tagenairanj dem towainajog  
 omniki mile gatab.

*Goro Gar ke Utkunda Riga Negir Mile Omnikam  
 Nya Tauyainim.*

<sup>13</sup> Si onggit paemb men goro kwa ngai b'usaya  
 meralenggyam meralenggyam b'esagikinum. Aji  
 win b'ogla nonyik b'atimdenindam odede da,  
 “Kon ma ita oramisin b'uwombenapu gasa o dis  
 koina gar ke utkunda nanyim o yingganim pilwa.”

<sup>14</sup> Kon wimena nekenyin Yonggyam Yesund gar  
 ke utkunda mile nate, si kon wumir en da get  
 ke God makwa ke yipa gog yoramitonj owou  
 dide ongong gasam pilind da, “Kilkil e ji.” Aji ra  
 yipat nony menamena ke okas da “Itemb ji kilkil  
 e,” si daka tinim re kilkil e. <sup>15</sup> Ra man moina  
 gar ke utkunda nanyim pilwa o yingganim pilwa  
 gar kopam tamneninyit owou dide ongong gasa  
 gatabim, si man makwa ita singi b'iyena mile ke  
 b'ingaenyit moina wimena wingirind. I goro man  
 moina owou dide ongong gasam pilke tin negir  
 omnikim, mop nokip Keriso ti mana uj awonj. <sup>16</sup> Si  
 onggit paemb goro rigap negirjog yit ke wen re-  
 sadreninem waina b'ogil owou dide ongong mile  
 gatab. <sup>17</sup> Mop nokip God ma pumb tungg re ma  
 owou, i ongong, i dide onaika mile ma, aji negir  
 kesa dimdimjog mile, i ngimbla, i dide sam mile ma  
 rinsim re Yinayina Wingawingat ogona niyeniny.

18 Mop nokip yet ra Kerisom wiko omnikainy odede nya ke, si God ita sam tainy ti pilwa, dide rigap ita tin imjatenyi isnawa kima. 19 Si onggit paemb ket men oraka eyenindam onggityam gasa rinsim re ngimbla yiyenyi dide onggityam gasa ringkaim re men meralenggyam meralenggyam b'arangindam wingawinga ke. 20 Si goro win owou dide ongong gasa map God ma wiko negir omnika yiyenya rinte re Ton rigaina garind omnika yiyeny. Komkesa owou dide ongong gasa re kilkesa im, aji itemb re negirjog e tinim yete re owou dide ongong eyeniny nony bebig kima. Ingkaimemb ninda rigap sap otendenanj. 21 Si itemb re b'ogiljog mile e ra man maka b'angga tanginyit, i maka ra ik tanainyit, i dide kwa maka ra ninda gasa tamnikinyit odede nony kima da, "Ke kon yipa koina gar ke utkunda nanyind o yingganind sap otendam yamnin." 22 Si nanggamog mile e man gar ke utkunda ke okati yowamet mor pilind, si man owama yiyene onggityam mile Godim wipind. I God ma b'ogil ita ti pilind yet ra tilenggyam b'itimjateny da "Itemb re iminjog mile e Godim wipind," i ingkaemb ton maka tilenggyam negirim b'itisagik onggityam tina mile gatab. 23 Aji yet ra maka imjateny da "Itemb re iminjog mile e Godim wipind owowim dide ongongim," i ra ton owou dide ongong teyeniny, si ton kemb negir ma b'isagika wira nate yibim. Mop nokip itemb mile re ma gar ke utkunda ke omniki e. I komkesa mile rinsim ra rigap maka ra gar ke utkunda ke tamnikanj, si opimemb re negir mile im.

# 15

## *Riga Samim Amneninam aji Goro Walenggyam*

<sup>1</sup> I men yepim re danda kima owinkindam gar ke utkundand, b'ogla turowatenaindam towaina bebig yepim re danda kesa wekeny gar ke utkundand, i goro meralenggyam sam rakateninum.

<sup>2</sup> Mera wingirind yipayipa riga ton b'ogil e tina riga samim yammen, si ingkaemb ton b'ogil okateny dide tin oranga iyeny wingawinga ke. <sup>3</sup> Mop nokip Keriso Toda makwa Tinim Tilenggyam samim awonj, aji yina peband ija emb ji iriki yibim da, "Ji malik omnika mile rinsim re rigap Men ji malik momnikenyi, si onggityam mile odobarkanj re Kor pilnasim." <sup>4</sup> Mop nokip komkesa iriki yitkak rina re naskand erikto yina peband, re meranim ouyaena mim iriki. Nokim da idenat men warim b'ogil isma okasu musik wimenam pilke dide b'ugowa milem pilke rinsim re onggit yina pebap wumir nomnenanj. <sup>5</sup> I God re musik wimena dide b'ugowa mile kima riga e, si ra win Keriso Yesu ma wingata yimta tundokindam, si ingkaimemb God wa takainy yipaina gasand nony menamena omnikam wa wingirind. <sup>6</sup> Nokim da idenat win esourenenya Godind, ite re mera Yonggyam Yesu Keriso ma B'u, yipaina gar ke dide yipaina tugim ke.

<sup>7</sup> Si onggit paemb win b'ogla walenggyam walenggyam b'atkatendindam Godind ewangayam odede wip ringma na re Keriso men nokasinonj.

<sup>8</sup> Mop nokip kon nitinjin da Keriso God ma obagendi tirir omni mal wugim ipki riga waina wiko riga awonj re ouyawa mana da, "God

ma yit re kea iminjogim awonj ti pilind.” Mop nokip ingkenaemb Ton kupkakupka iminjog ke amninonj Godimna tirir omni yit rina re Ton Ju riga waina b'umar wa akainonj. <sup>9</sup> I kwa nokim da idenat God ma obagiki kesa rigap Godind esourenenyi Tina kear map. Si ija emb ji iriki yibim yina peband da,

“Si onggit paemb Kon Men metisourenenyin Koina obagiki kesa riga wingirind,  
dide Kon Moina nyi esourenenyin dem ara ipaya gasa kima.”

<sup>10</sup> I b'usaya kwa yina pebat yindeny da,

“Win God ma obagiki kesa riga, Tina obagiki riga kima ukoi sam na yomnika!”

<sup>11</sup> I kwa b'usaya yindeny da,

“Win komkesa God ma obagiki kesa rigap b'ogla yesoulita Yonggyamind,  
dide win komkesa rigap Tin b'ogla kwa yesoulita!”

<sup>12</sup> I kwa b'usaya Isaya yinj da,

“Yipa Yesai ma b'usmureni B'iga ita pita tainy dem odede it re ra wul dipond wil tilis,  
i Ton ita towinyis dem God ma obagiki kesa riga wip iyenam,

i dide God ma obagiki kesa riga opima warim b'ogil isma Ti pilind oramisi dem.”

<sup>13</sup> I warim b'ogil isma kima God wen yindangir tamnikiny komkesa sam ke dide ngimbla ke waina gar ke utkunda wimenand, nokim da idenat waina warim b'ogil isma ukoi jog warabag taukeneny Yinayina Wingawinga ma okai danda ke.

*Polimna Wiko God ma Obagiki kesa Riga Wingirind*

<sup>14</sup> Kor gar ke utkunda nany dide yingganwar! Kon kolenggyam kwa kupkakupka iminjog ke wumir yokatenyın wa gatab da win walenggyam b'ogil mile ke yındangır im wekenyit, i komkesa wumir ke yındangır im, si win rırır im walenggyam walenggyam b'auyaenam. <sup>15</sup> Aji Godimna okai wurar kae kon moga kesa danda kima wa erikainyın nında gatab yitkak rinsim ra wen b'usaya nonony tamnenanj. <sup>16</sup> Si God itemb wurar nokawonj re nok mana da idenat kon Keriso Yesumna b'ogil wiko riga taen God ma obagiki kesa riga wa wingirind, i kon yina si riga pila en God ma yirkokar bage yit warabag omnıkam wiko yiyenyın. Nokim da ra Yinayına Wingawingat opimemb God ma obagiki kesa riga yınam tamneniny yena re kon si gasa pila eyenyın Godim okawam, si idenatemb God sam kima temjateniny ten okatam. <sup>17</sup> Si onggıt paemb kon Keriso Yesu kima wımenand b'asourena yokatenyın Godimna onggıtyam wiko gatab rınte re kon omnıka yiyenyın. <sup>18</sup> I Kon moga en nında b'enga yitkak opurenam, aji kon ına nena yitkak im moga kesa apureninyın rına re Keriso ken ningawonj God ma obagiki kesa riga wa yit opurenam dide towanıım wiko omnıkam, nokim da idenat kon ten teyeninyın Godınd yımta undokam. <sup>19</sup> I kwa Keriso ken ningawonj kid kesa kima danda wiko dide moga kima danda wiko omnıkam God ma Yinayına Wingawıgamna danda ke. Si kon Kerisom gatab God ma b'ogil yirkokar bage yit kupkakupka warabag omnıka

yiyenond komkesa eriya nata Yerusalem taun ke ngirpu dea ta Ilurikon gatab wa. <sup>20</sup> Si kon odede gar ke danda kima e singi aenyin da God ma b'ogil yirkokar bage yit pitapita omnenyin rokate re rigap maka Kerisomna nyi yewangaenenyi. Mop nokip ke kon sosi yarangin b'enga riga ma ispiki pipmetind rikind re yipa rigat yotomonj God ma b'ogil yirkokar bage yit pita omnenam. <sup>21</sup> Aji ija emb ji yina peband iriki yibim da,

“Riga yepiya re maka Ti gatab bage yit yokato, ton ita yir ongi dem,  
dide riga yepiya re maka utkundo, ton opima nony taukanj dem.”

*Polimna Isamki Yit Roma wa Menonim*

<sup>22</sup> I onggit mop paemb kor nya re ita winind idoki im wekeneny wa pilwa menonim. <sup>23</sup> Aji kor makwa ita ngai yipa pipmet wiko omniam onggit eriya wingirind, i ita kor gar ke singi wa pilwa menonim nibnaeneny, aji iurena e yiyeneny jogjog kemag kima. <sup>24</sup> Kor ita nony wen odaram nyatny-ata de Spein wa. Si kor ita ngor wa warim singi menonim wa pilwa wen yir ongongim. I ra kon neken wa pilwa, naska kon win kima sobijog gang-gand nitibnyin sam okatam. I ingkaemb kon ket iwasin dem de Spein wa waina yim b'akawa kima. <sup>25</sup> Aji yu kon neken Yerusalem taun wa re yina riga yim okawa ma. <sup>26</sup> Mop nokip Makedoniya sosi dide Akaya sosi ukoi sam kima singi eyento gasa kesa yina riga yepiya re wekenonj Yerusalem taun wa, i ton wulkip atabikauto towanim yingg iyenam. <sup>27</sup> Si ton sam kima singi na auto onggityam yingg iyenam. I iminjog e da ton re towanim

mira itendi kesa riga na wekenonj. Mop nokip ra God ma obagiki kesa rigap wingawinga gasa yingg takatenanj Yerusalem sosim pilke, si todaka b'ogla mira tetendaunanj gim gasa ke ten yim okawam. <sup>28</sup> Si onggit paemb ra kon onggityam wiko undwasin dem dide ra kon onggityam wulkip gasa kupkakupka towa iminjog takainyin dem, si kon ket iwasin dem de Spein wa. I dide nyatnyata wen tasmarinyin dem. <sup>29</sup> I ra kon wa pilwa neken dem, kon wumir en da itemb re Keriso ma b'ogil ke kupkakupka yindangir kima e dem.

<sup>30</sup> Gar ke utkunda nany dide yingganwar! Kon wen tugoinyin mera Yonggyam Yesu Kerisom nyi kima dide Yinayina Wingawingamna singi b'iyena kima da win kon kima yipand gilgil gejam tonyisindam kor gatab yir opmita ke Godim pilwa. <sup>31</sup> I win yir topmitenindam onggit gatab da Godte ken netwaikis gar ke utkunda kesa riga wa pilke yepim re Yuda eriya wingirind wekeny, dide yina rigap koina yim b'akawa wiko sam kima yakate Yerusalem taunind. <sup>32</sup> Rada Godimna singi ita, si ingkaemb kon ukoi sam kima neken wa pilwa, dide win kima yipand gilgil wiram wimena okatenyin. <sup>33</sup> Ngimbla God komkesa win kima, iminjog!

## 16

### *Ninda Yina Riga wa pilwa Simesime Yitkak*

<sup>1</sup> Kon wa pilwa pitapita tomnyin mera gar ke utkunda ngimir Poibend yeto re Kengkrea sosi wiko kongga wibim. <sup>2</sup> Win b'ogla tin simesime tomnanya Yonggyamim nyi kima odede it re yina

riga waina b'ogil isnawa nya ke re dide, i win tin yim tokaenya nanggamog im re ton singi amneniny wa pilke okatam, mop nokip ton kea yim akaeneninonj jogjog riga dide kwa keda.

<sup>3</sup> Win koina widaemb yit tusekaya Priskila ake Akwila towa pilwa, ton re kor wikomad i Keriso Yesumna wiko wingirind. <sup>4</sup> I Ton koina yirkokar map towaina yirkokar b'akawonda, si ma kon nenate siteket amnenenyin, aji komkesa God ma obagiki kesa rigaina sosi toda kwa kea siteket amneneno. <sup>5</sup> I win kwa koina widaemb yit tusekaindam onggit sosim pilwa yepim re towaina met wa yir opmitenenanj. I koina madaemb yit usekaya koina singi iyena riga Epainetom pilwa yete re naskajog engendi riga Kerisom pilind Asiya eriya wingirind. <sup>6</sup> I koina madaemb yit tusekaya Mariyam pilwa yet re wanim beb'ig kima ukoi jog wiko amnikeninonj. <sup>7</sup> I koina widaemb yit tusekaya kor gu riga nimog, Androniko ake Yuniya towa pilwa yepiya re kon kima yipand sibibmetind ebnonda. I ton re itmikitijog riga wa pilind ukoi ongwati riga i ebnya, i kwa ton naska nata Kerisom pilwa engendonda aji kon re yimtanyam en. <sup>8</sup> I koina madaemb yit usekaya Ampliyatom pilwa yena re kon singi yiyenyin Yonggyam kima wimenand. <sup>9</sup> I koina widaemb yit tusekaya towa pilwa, Urbano yet re mera wikomad Keriso ma wiko omnikand, dide Staki yena re kon singi yiyenyin. <sup>10</sup> I koina madaemb yit usekaya Apelem pilwa yete re isnawa kima imjati riga e yibim Kerisond ewangayand. I koina widaemb yit tusekaindam towa pilwa yepim re wekeny Aristobulomna



metind. <sup>11</sup> I koina widaemb yit usekaya kor gu riga Erodiyoni pilwa. I koina widaemb yit tusekaindam towa pilwa yepim re wekeny Yonggyamind ewangayand Narkisomna metind. <sup>12</sup> I koina widaemb yit tusekaya Tripaina dide Triposa towa pilwa yepiya re beb'ig kima wiko amnikeninonda Yonggyamind ewangayand. I koina madaemb yit tusekaya gar ke utkunda kongga Persisim pilwa yena re kon singi wiyenyin dide yet re beb'ig kima ukoi jog wiko amnikeninonj Yonggyamind ewangayand. <sup>13</sup> I koina widaemb yit tusekaya towa pilwa, Rupo yete re obagendi riga yibim Yonggyamimna wiko omnikam, dide kwa ti mog yet re ken yir nipkenenonj ti b'iga pila. <sup>14</sup> I koina widaemb yit tusekaindam towa pilwa, Asingkrito, Plegon, Erme, Patroba, Erma i dide gar ke utkunda nany dide yingganwar yepim re ton kima wekeny. <sup>15</sup> I koina widaemb yit tusekaindam towa pilwa, Pilologo dide Yuliya, Nerea dide ti ngimir, i Olimpa dide komkesa yina riga yepim re ton kima wekeny. <sup>16</sup> I win walenggyam walenggyam simesime b'amneninam yina b'amongnena kima. I dide komkesa Kerisomna sosip widaemb yit etmikurauranj wa pilwa.

### *Nonony Yitkak B'anyginena Ouyaena Riga gatab*

<sup>17</sup> Gar ke utkunda nany dide yingganwar! Kon kwa wen tugoinyin. Si win yir kima tekenyit towa gatab yepim re gar ke utkunda riga wa wingirind gangga ikalka mile omnika eyenanj dide nenegir nya ke auyaenenanj ouyaeni yirkokar bage yitkakim pilke rina re win b'auyaenentondam itmikitijog riga wa pilke. I dide win b'ogla

tewaikenindam towa pilke. <sup>18</sup> Mop nokip odede rigap ma mera Yonggyam Keriso mim wiko yomnikauranj, aji ton ngimblakak yit opurena kaim dide otomanti opurena kaim negir kesa rigaina gar ugungatena eyenenanj negir nya wa. Si odede wiko omnika kaim ton towainajog gim ke singi nena akatenenanj. <sup>19</sup> I waina Yesund yimta undoka gatab yit kea komkesa gatab wa wumir yikenonj. Si onggit paemb kon ukoi jog sam ainyin wa pilwa, si kon singi en da win b'ogla b'ogil multekip kima riga taukindam onggitim nanggamog im re b'ogil, aji b'ogla multekip kesa riga taukindam onggitim nanggamog im re negirjog. <sup>20</sup> Ngimbla God momta e Satanand waina pis wirand ingolik. Mera Yonggyam Yesu ma wurar win kima!

*Ninda Pol ma Wikomadwar waina Simesime Yit*

<sup>21</sup> I kor wikomad Timote dide koina gu riga Lukiyo, Yason, dide Sosipatro, towa pilke wa widaemb yit etmikurauranj. <sup>22</sup> I kon Tertiyoten yete re kon onggityam peba irika yiyenyin, widaemb yit wen amninyin Yonggyamim nyiwind. <sup>23</sup> I Gaiyo yete re ken obai nomneneny tina metind widaemb yit wen amniny, dide kwa kupkakupka sosit widaemb yit wen amniny. Erasto yete re wulkip yir ipka riga yibim onggit taunind, wen widaemb yit amniny, i dide kwa gar ke utkunda riga Kuwarto daka wen widaemb yit amniny. <sup>24</sup> [Mera Yonggyam Yesu Kerisomna wurar komkesa win kima, iminjog!]

*Undwatapu Yitkak*

<sup>25</sup> God ririr e wen tutnikiny danda kima koina pitapita omnene God ma b'ogil yirkokar bage yit ke dide Yesu Kerisom gatab pitapita omnene yitkak ke. I onggityam pita omnene yitkak re wigawiga gasa e rina re b'ila b'atobarkonj dide egiti yibnenenonj. <sup>26</sup> Aji yu itemb ket pita ainy bageyam waina iriki peba wa pilke rina re ngirpu kesa God engainonj irikam, nokim da idenat ton wumir tagoniny b'engabenga yitam riga wa gar ke utkunda ke okatam dide yimta undokam.

<sup>27</sup> Yesu Kerisom pilke b'ogil inyomarena ngirpu kesa de yipaina b'ogil multekip kima Godim pilwa, iminjog!

**Wipi Yit God ma Yina Sisil Yina Peba**  
**The New Testament in the Wipi Language of Papua**  
**New Guinea**  
**Nupela Testamen long tokples Wipi long Niugini**

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

---

PDF generated using Haiola and XeLaTeX on 21 Feb 2024 from source files dated 31 Aug 2023

a5a5213a-fb12-52b5-9c99-efb8044c6646